

# Yesule Miyegengkeicne Yoanedi Kwelengkewec

## *Mimi-yegengyowa*

Yoane ye Yesule siduc edocebame Roma gamangti balu Patmos nucka lobong muc-macka ingucne gawec. Ngic-ngigac gocne wosaelu yanguc ngagegaing, Yoane yogo ye Yesule mic-tengteng. Dameng iwa Roma gamangti Yesule habu ngaba aiyelelu doicka locebaibong.

Yesu homackacni gboliyelu honocmengka feme hifa 65 ngama ingucne motome, Yoane Patmos nucka gaemewa Yesudi gungka ingucne fikecnolu yowa edolu wiyac lobewa fikedaicte, yogolec soc holelu mime yegengkewec. Nga wiyac lobewa fikedaicte, yogo yele dongewa biyachac fikeme nganiwec. Ilec yowa gocne ye biyac fikeicne ingucne kwelengkewec. Aime wiyac fikebong nganicebawec, yogo damengngineng alingka mi balaibegaing mecne. Wiyac nganingagec ailu hibi yagowa kwelengkewec. I yangucte, Yesule habu basanangebame Yesuholec taoocke-galu umacka mi wawedaingkale, hibi yago kwelengkewec. Umac monic, yogo gamangti mime damongngineng ye wapong ingucne afeed-abiyeng, ye sawang yowa inguc kwelengkewec. Aime Yesu ye wac feicne badaicte. Ailu Wapongti yele ngaba nga Satang ewalicebame sowalebong yeicne aling bamadicebame yeholec gadaingte, siduc yogo kwelengkewec.

Aime noine, Wapongte siduc-mimi ngic yenge wiyac lobewa fikedaiacte, yogolec yowa kwelengkeibong, dameng iwa wafebong nebocinele fungine yegenabenang mi fikegac. Aime siducngineng noine fikedaiacte, dameng yogowabac yegenabenang aidaicte. Ailu hibi yagowa wiyac homacne yengele dzaleine 7 me dzaleine 12 fagac. I yangucte, dzaleine 7 nga 12te fungine yogo soc holelu wiyac bucbuchac fagac me wiyac moto-motoine motogac.

Yowa homacnele fungine yogo Wapongte Hibi Esecne iwa yowa kwelengkeicne fagachac. Yogolec bageina hibi wacngineng nga fengngine fagac.

*Yowa yago hibi nebocina fagac*

- 1:1–8 Molic-molic yowa
- 1:9–20 Yesudi gungka ingucne Yoane fikecnowec
- 2:1–3:22 Yesule habu 7 yengele yowa
- 4:1–5:14 Wiyac honocmengka nganiwec
- 6:1–8:1 Umac 7 hibiwa fagac, yogo himongka fikedaingte
- 8:2–11:19 Angelo 7 yenge kpeng 7 fitobong himongka nga sawawa umac fikedaingte
- 12:1–13:18 Satang nga yele bole-ngic yaeckang yenge himongka yegena fikelu gadaingte
- 14:1–15:8 Wiyac haicine monic-monic nganilu ngagewec
- 16:1–21 Angelo 7 yenge pele 7 sotingkebong Wapongte aalictc ameine himongka fikedaiacte
- 17:1–18:24 Wapongti Babilon basowaledaicte

19:1–20:15 Yesudi kwesilu ngabaine  
 Satangkolec wenagulu dac kiwec ingucne  
 iwa lodaicte  
 21:1–22:5 Honocmeng nga himong ailu  
 Yerusalem gbolicne  
 22:6–21 Yesu nga Yoane yekele baba-sanangte  
 yowa nga sawang-yowa

*Yoanedi wiyac nganiwec yogo miwec*

<sup>1</sup> Yowa yago Yesu Kristodi mime yegengkegac. Yele kwelec kwekwe ngic-ngigacfocine yenge wiyac biyac fikenale edalicebadaicte, yogo Wapongti Yesu lacnowec. Ailu angeloine monic saleme yedi yowa maaineholec mime yegengkeme kwelec kwekwe ngicine Yoane, na hocne yowa yogo edocnuwec.

<sup>2</sup> Edocnulu Wapongte yowa nga Yesu Kristole siduc mime yegengkeme nani wiyac naneuc dongenedi ngani-ngagec aiiba, yogo sasawa mibe yegengkegac.

<sup>3</sup> Dameng bangkalegacte monicti Wapongte siduc-yowa yago wafe-ngagec aiyelegac, ye kwele-angackolec aigac. Aime ngic-ngigac yenge yowa yagowa kwelengkeicne fagac, yogo ngagelu balai begaing, yenge inguchac kwele-angackolec aigaing.

*Yesule habu yengele yowa*

<sup>4</sup> Na Yoanedi Asia prowins kwelina Yesule habu 7 gagaing, ngengele hibi yago kwelengkegabac. Wapong gawec nga gagac ailu gacgu kwesinowagac, ye ngictaule ngiye-ngiyewa ngiyegac. Nga

asu 7\* yenge yele emewa gagaing, yengelacni kwele-madic nga kwele-mogungtowadi ngenge-holec fadaic.

<sup>5</sup> Aime Yesu Kristo yelacni inguchac fadaic. Ye yowa balaibe-balaibele widec ngic noine. Ye molickenolelu homackacni gboliyelu fangkelu fikewec. Ailu himongte ngictau yengele damongngineng. Ailu ye nongileng kweleinedi angac ngagelu sacinedi bikickacni bamoctocnubawec.

<sup>6</sup> Bamoctocnubalu ngani-damongte habu bacnubalu yeicneholec alingnubawec. Alingnubame nongileng yele Wapong Mamacinele depec-baba ngic ingucne ailu mimiteng bole balu gagabeleng, yogolec inguc aiwec. Yela wac feicne nga tapili yogo moto-motoine mikac fafegidaic, yogo foinac.

<sup>7</sup> Nganining, ye kaguwa kwelina kwesime ngicngigac sasawa yenge dongenginengti nganidaingte. Aime socina sangaladi kwemblackeibong, ngic yogo yenge dongenginengti ye inguchac nganidaingte.

Aime himong fengnginang fengnginangsoc ngicngigac sasawa yenge ye ngagesilu kwelesowac sugucnehac ailu hiyadaingte. Oc, yogo fikedaicte, yogo foinac.

<sup>8</sup> Sugucne Wapongti yanguc migac, “Ye gawec nga gagac ailu gacgu kwesinowagac, yogo na-

---

\* **1:4:** Ngic gocne yengi yanguc ngagegaing, asu 7 yogo Tili Asu wacine monic. Nga ngic gocne yengi yanguc ngagegaing, asu 7 yogo angelo me angelo ingucne wiyac gocne. **1:4:** Dan 7:9-14; Wah 3:14-15; Miye 3:1; 4:5 **1:5:** Kol 1:18; Mige 89:27,37 **1:6:** Dan 7:18; Wah 19:6; 1Pi 2:9; Miye 5:10; 20:6 **1:7:** Dan 7:13; Sek 12:10; Mat 24:30; Yoa 19:34-37; 1Tes 4:17

neuctihac. Na Tapilitowa Fileine, na ‘A’ nga ‘Y’, yogo molic-molicine iwacni moto-motoine.”†

### *Kristo nganiwec*

<sup>9</sup> Na Yoanedi Wapongte yowale nga Yesule mibe yegengkewecte ailu Patmos nucka gaiba. Na ngengele ngic hae-gbangineng, ngenge nga na nongileng momoc Yesuholec wetackelu doic nga Wapongte ngani-damong bagacgu tatakic mikac sanangne gagabeleng.

<sup>10</sup> Sugucnele hadeng‡ monicka Asudi nala bole bame, lobena yowa-malac monic sugucnehac kpeng ucine ingucne ngagebe

<sup>11</sup> yedi yanguc miwec, “Ga wiyac nganigic, yogo hibiwa kwelengkec. Kwelengkeli Yesule habu yenge taon 7, yogo Efesas nga Simina ailu Pegamum nga Taiataira ailu Sadis nga Filadelfia ailu Laodisea, ga hibi yogo yengela loengka hikeme nganibong lolickena.”

<sup>12</sup> Inguc mime yowa-malac yogo ngagelu nganinogale hefaliyeiba. Hefaliyelu nganibe hifa yenge higengineng 7 edelu domaibong. Hige 7 yogo goldi baicne ingucnedi domabong nganiiba.

<sup>13</sup> Nganicebabe yengele hewackacni monicti Ngicte Madecte silic ingucne domawec. Ye ngakpiine dalicne holeme susucnedi higeine

---

† **1:8:** Grik yowawa ye yanguc miwec, “Naneuctihac Alfa nga Omega.” Alfa yogo Grik yowa nenggacinele hibi molic-molicine nga Omega yogo moto-motoine. “A” yogo migabac yowa nenggacinele molic-molicine nga “Y” yogo moto-motoine. **1:8:** Miye 21:6; 22:13 ‡ **1:10:** Sonda wacine monic yogo Sugucnele hadeng. Gocne yengi ngagebong, yogo Sugucnele hadeng monic lobewa fikedaicte. **1:10:** Wah 19:16 **1:11:** Dan 7:10 **1:12:** Sek 4:2,10

someckeicne, nga mondacina umbika goldi baicne yogodi hefeicne fawec. §

14 Ye hodoc-luweine nga hodoc-dowecine kwalac-kwalac yogo lama dowecine suweicne nga kaguwa wenacti kweme kwalackegac ingucne\*\* ailu dongeine yogo dac-ubolang ingucne.

15 Aime aen sasacne dacka lobebong latac-latacineholec aicaigac, ye higeine yogo ingucne aiwec. Aime yowa-malacine yogo misa dundung bocyac yengele ucngineng ingucne aiwec.

16 Ye mole-foleinapecti asocmeng 7 bacebalu domawec. Aime micinacni hudu-babale fitec micine nga lobeine yogo micineholectihac ofelu wawec. Haic-mesuine yogo wenac-dongeine tapiliineholec ofecaigac, yogo ingucne aiwec.

17 Aime ye nganilu higeine emeina wawelu homaicne ingucne fabe, yedi mole-foleinedi nale feiwa lolu yanguc miwec, **“Ga mi hangocguna, na molic-molicine nga moto-motoine.**

18 **Nganigic, na gaganeholec gagabac. Na homaiba ailu hatacmac gbolicne gagabac. Ailu ngagegic, na moto-motoine mikac gaibadi gagabachac, homac nga Wangec-mac yekele ki balu gagabac.**

19 **“Ilec ga wiyac nganigic yogo kwelengkec. Yogo wiyac yakumac fagac ailu lobewa fikedaicte,**

---

§ **1:13:** Depec-baba ngic yenge ngakpi ingucne holelu gaibong.

**1:13:** Dan 7:13; 10:5   \*\*   **1:14:** Grik yowawa “Mac tilowa wiyac kwalac-kwalac kaguwa kwelinacni mac ingucne wacaigac,” inguc kwelengkeicne fagac.   **1:14:** Esek 43:2; Dan 7:9; 10:6; Miye 2:18; 19:12; 14:2   **1:16:** Dan 12:3; Yes 11:4; 49:2; Hib 4:12; Miye 2:12; 19:15   **1:17:** Dan 7:15; 10:9-12; Yes 44:6; 48:12; Miye 2:8; 22:13

yogolec kwelengkec.

<sup>20</sup> Asocmeng 7 mole-folenedi bacebagabac. Ailu hifa higengineng 7 goldi baicne nganigic, yogolec ngage-ngage sangkeicne yanguc fagac. Asocmeng 7 yenge Yesule habu 7, yengele angelo.†† Nga hifa higengineng 7 yenge Yesule habu 7 aigaing.”

## 2

### *Efesus habu*

<sup>1</sup> “Ga Yesule habu Efesus iwa gagaing, yengele angelola yowa yago kwelengkec.”

“Ngic asocmeng 7 mole-foleinedi bacaigac. Ailu hifa higenginengkolec 7 goldi baicne yengele hewacka lolickecaigac, yedi Efesus iwa ngengele\* yanguc migac,

<sup>2</sup> ‘Na ngengele aibabangineng nga doicbolengineng ailu sanangne domacaigabiyeng, yogo ngageyackegabac. Ailu ngenge ngicngigac sowacne yengele mi aingelecaigac, yogo ngagegabac. Ngic gocne yenge yengileng salecebaicne micaigaing. Ailubac yenge salecebaicne mi aigaing, ngenge yenge lokwesac

---

†† **1:20:** Grik yowawa angelo yogolec fungine yaeckang heuckeicne, yogo angelo me salecebaicne. Angelo yago fagac, yogo angelo monicti me ngic monicti yogo mi mime yegengkeicne. **1:20:**

Dan 2:28-30; 12:1-3 \* **2:1:** Yesule habu 7, yengele angelola kwelengkeyewec. Gocne yengi yanguc ngagegaing, angelo yogo ngicbenang yengele damong. Ailu ye damongte ngagelu Grik yowawa “ga” milu kwelengkeyewec. Aimebac yowa sasawa yogo Yesule habu yengele aibaba nga yowa, yogo damongte yowa sugu miyac. Ilec ailu Grik yowawa “ga” bafaliyelu “ngenge” kwelengkabeleng. **2:1:** Miye 1:16

aiyeleebongka yenge kwesac-ngic, yogo biyac yegengkeibong.

<sup>3</sup> Ngenge tatakic mikac sanangne domacaiga-biyeng. Aime nale wacte ailu umac bocyac balu tapilingineng mi wawec.’ ”

<sup>4</sup> “Aime molickelu kwele-angacnginengte aibaba yogo hegileibong, yogolec ngagebe mi madickegac.

<sup>5</sup> Ngenge esecne gagangineng wenucka hegilelu waweibong, yogolec ngage-ngage bole badabiyeng. Ailu kwelengineng hefaliyeme aibabangineng molickelu wenuc ailu gaibong, yogo aidabiyeng. Inguc mi ailu kwelengineng mi hefaliyedabiyengtewa, na ngengela kwesilu hifangineng higeineholec macinacni baickedacte.

<sup>6</sup> Ngenge aibabangineng madicnebac yanguc, ngenge Nikolas habu† yengele aibaba yogo kwelenginengti hegilecaigaing, na inguchac yogo kweledi hegilecaigabac.”

<sup>7</sup> “Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye gagale yoc Wapongte mac madicnebenang iwa domagac, yogowacni noine nalic lacnobe nodaicte.”

### *Simina habu*

<sup>8</sup> “Ga Yesule habu Simina iwa gagaing, yengele angelola yowa yago kwelengkec.”

---

**2:2:** 1Yoa 4:1    **2:5:** Miye 3:3    † **2:6:** Nikolas nga ngic-ngigac yele yowa balaibelu yanguc ngageibong, siduc-gbong alang bacno-caigaing, nga selo-boic aibaba aicaigaing, aibaba ingucne umacine mikac nalic ainoga.    **2:7:** Yes 6:9-10; Esek 3:27; Fike 2:9; Miye 22:2,19



“Ngic molic-molic nga moto-motoine, ye homalu gboliyewec gagac, yedi Simina iwa ngengele yanguc migac,

<sup>9</sup> Ngenge doic ngagelu socte wiyacka waweweine gagabiyeng, yogo ngageyackegabac. Ailu sifu kwelele wiyacka wakegabiyeng. Ngic misulec aigelecaigaing, yenge yengileng Yuda ngic-ngigac milubac Yuda ngic-ngigac noine mi ailu Satangte kpakpaduc mac aigaing, na yogo inguchac ngagegabac.

<sup>10</sup> Ngenge doic ngagenogale mi hancocngabadaic. Aleng Sugucnengineng ye lokwesacka locngewanale ngageme, ngengelacni gocne muc-macka locngebabong, ngenge hadeng 10te kwelina doickolec gadaingte. Aime ngenge nale yowa balaibelu sanangne galu homaebongka, gagale maaine sil ingucne ngeledacte.”

<sup>11</sup> “Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye homac alecine yaeckangti nalic mi basowaledaicte.”

### *Pegamum habu*

<sup>12</sup> “Ga Yesule habu Pegamum iwa gagaing, yengele angelola yowa yago kwelengkec.”

“Ngic hudu-babale fitec micine nga lobeine yogo micineholechac balu domagac, yedi Pegamum iwa ngengele yanguc migac,

13 ‘Satangti ngictaule ngiye-ngiyewa ngiye-gac, ngenge taon iwa gagabiyeng, yogo ngege-gabac. Ailu Satangti gagac, iwa Antipas ye nale yowa sanangne mime yegengkeme balaibelu game, ye wehomaibong. Aime ngengele hewack-acni Antipas wehomaibong. Aime ngenge sifu ngagesingnulu nale wac sanangne balu gaibong. Ailu wacne mi bisockeibong.’ ”

14 “Aibaba gocne ngengela fagac, yogolec ngegebe mi madickegac. Ngic-ngigac gocne ngengeholec gacaigaing, yenge Balamte wewedu-yowa balaibecaigaing. Yedi Israel alingfocine okac ingucne lome waweningte Balak weducnowec. I yangucte, yenge siduc-gbongte depecte sic nolu selo-boic bole‡ banogale inguc aiwec.

15 Ingucne gocne yenge Nikolas habule wewedu-yowa balaibecaigaing, yenge inguchac ngengeholec gagaing.

16 Ilec ailu kwelengineng hefaliyena. Inguc mi aidabiyengtewa, na ngengela biyachenang fudacte ailu hudu-babale fitec micna fagac yogodi wecebadacte.”

17 “Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye nani mana nosing sangkeicne

---

**2:13:** Mige 89:37; Yes 43:10-12    ‡ **2:14:** Dameng gocna, yogo ngic-ngigac yenge selo-boic aibaba aigaing. Nga dameng gocna yogo Wapong nga siduc-gbong me wapong kwesacine yeke momoc alang bacepagaing, yogo selo-boic aibabale silic ingucne.    **2:14:** Him 22:5-25:3; 31:16; 2Pi 2:15    **2:16:** Him 31:8; Yos 13:22; Miye 3:11

yogo lacnodacte. Ailu posa monic kwalac-kwalacka wac gbolicne monic kwelengkeicne fagac, yogo lacnodacte. Wac yogo monicti mi ngagedaicte, ngic posa nalacni badaicte, yedi sugu ngagedaicte.”

### *Taiataira habu*

<sup>18</sup> “Ga Yesule habu Taiataira iwa gagaing, yengele angelola yowa yogo kwelengkec.”

“Wapongte Madec ye dongeine dac-ubilang ingucne. Ailu aen sasacne dacka lobebong latak-latacine aicaigac, higeine yogo ingucne, yedi Taiataira iwa ngengele yanguc migac.

<sup>19</sup> ‘Na aibabangineng nga kwelenginengti ngic-ngigac yengele angacngibacaigac, yogo ngagegabac. Aime ngage-ngagesingngineng sanangkeme galu tatakic mikac bolewa baficebacaigabiyeng, yogo ngageyackegabac. Ailu aibabangineng yakumacti esecne molickelu aibaba ailu gaibong yogo ewaligac.’ ”

<sup>20</sup> “Aime sifu ngigac wacine Yesebel, ye yeicne siduc-mimi ngigac micaigac. Ye wewedu bole kwesacine bagacgu selo-boic aibaba nga siduc-gbongte depecte sic nolu, yefe iwa nale kwelec kwekwe ngic-ngigacfocne bacebalu gawec. Aime ngenge yogo mi kpatalacnolu gacaigabiyengte ngagebe mi madickegac. §

---

**2:17:** Wah 16:4,14-15,33-34; Yoa 6:48-50; Yes 62:2      **2:18:** Dan 3:23-25; 10:6; Miye 1:14-15      § **2:20:** Ngigac siduc-yowa miwec, yele aibaba yogo ngictau Ahab ngigacine Yesebelle aibaba ingucne aiwec. Yedi siduc-gbong nga hefec-dinac aibaba gocne bakwesilu Israel ngic-ngigac bacebame siduc-gbong afeelu gaibong.      **2:20:** 1Ngt 16:31; 2Ngt 9:22

21 Ye nani kweleine hefaliyenale dameng lacnoiba. Aime ye kweleine hefaliyeme selo-boic aibabaine hegilenale mi aicnogac.”

22 “Ngagegaing, ngigac ye huc aicnome mapicina fanale lodacte. Aime ngic-ngigac weni yengi yeholec wetackelu selo-boic aibaba aicaigaing, yenge yele aibaba yogo hegilelu kwelengineng mi hefaliyedaingtewa, doic umacnehacbenang ngagedaingte.

23 Aime na yele adu-madecfocine hucti wecebabe homadaingte. Inguc aibe Yesule habu sasawadi yanguc ngage-motodaingte, na ngagenagewa nga kwelewa ngani-wosaec ngic. Na ngenge filesoc filesoc aibabanginengte silicka ameine badungeledacte.

24-25 Aime Taiataira habuwa ngic-ngigac tofaine gagaing, ngenge Yesebelle wewedu nga Santangte ngage-ngage gbolongne migaing, yogo mi baibong. Ngenge yanguc edocngebagabac, wiyac fangelegac, ngenge yogo sanangne balu gadaing. Aime yogolec feiwa umac monic mi taockedacte. Aime yogo balu gabong na fudacte.”

26-27 “Monic ye hudu welu gbelong aidaicte ailu nale aibaba sanangne balu game dameng motodaicte, yele yanguc migabac, Na Mamacnelacni bole-yowa tapiliineholec balu himongne himongne yengele Sugucne gagabac. Aime silicine ingucnehac ngic gbelong aidaictewa, himongne himongne yengele sugucne ganogale bolele hibi nga tapili lacnodacte.

‘Aime ye ngictaule yasu aenti baicne yogo balu damongebalu gadaicte. Ailu ngicti hebec kwouckecaigaing, silicine ingucnehac gocne kwoucebadaicte.’ (Mige 2:9)

<sup>28</sup> Ailu na ubiyacte asocmeng yogo inguchac lacnodacte.

<sup>29</sup> Monic hedeckolec ye Asudi Yesule habufocine yowa edocebagac, yogo aneng ngagedaic.”

### 3

#### *Sadis habu*

<sup>1</sup> “Ga Yesule habu Sadis iwa gagaing, yengele angelola yowa yago kwelengkec.”

“Ngic Wapongte asu 7 nga asocmeng 7 balu domagac, yedi Sadis iwa ngengele yanguc migac, ‘Na aibabangineng ngageyackegabac. Ngenge gagaholec gagabiyeng edocngebacaigaing. Ailu sifu ngenge homaicne silic gagabiyeng.

<sup>2</sup> Ilec ailu ngenge yeucnagulu deboc-gboli gadaing! Aibabangineng tofaine homanogale ailu fagac, yogo bamadickelu basanangkening. I yangucte, ngenge aibabangineng ngani-motogabac. Aimebac Wapongnele ngani-nganiwa nalic mi aigac.

<sup>3</sup> Yowa molickelu ngengela kwesime ngagelu baibong, yogo ngagesilu balaibedabiyeng. Ailu kwelengineng hefaliyedabiyeng. Inguc ailu ngenge deboc-gboli mi gadaingtewa, na hisebaba ngic ingucne ngengela fudacte. Ailu ma

damengka fulu webating aingeledacte, yogo nalic mi ngagedaingte.’ ”

<sup>4</sup> “Aime ngengele alingkacni ngic-ngigac efecnemacti sugu aibabanginengti ngakpi-kpoluc ingucne babong wonongkolec mi aiwec. Na nganibe andoine aigaingte yenge ngakpi-kpoluc kwalacne holelu naholec momoc hike-kwesic aidabelengte.

<sup>5</sup> Inguc ailu monic ye hudu welu gbelong aidaicte, ye ngakpi-kpoluc kwalacne holedaicte. Aime na yele wac Gagale hibiwacni nalic mi baickedacte. Ailu yele wac yogo Mamacne nga angelofocine yengele haicka mibe yegengkedaicte.

<sup>6</sup> Monic hedeckolec ye Asudi Yesule habu-focine yowa edocebagac, yogo aneng ngagedaic.”

### *Filadelfia habu*

<sup>7</sup> “Ga Yesule habu Filadelfia iwa gagaing, yengele angelola yowa yago kwelengkec.”

“Gbagbacne nga yowa noinele fileine, yedi Dawidile ki balu gagac. Ye nu laliyeme monicti nalic mi holedaicte. Ailu nu holeme monicti nalic mi laliyedaicte. Aime yedi Filadelfia iwa ngengele yanguc migac,

<sup>8</sup> ‘Na aibabangineng ngageyackegabac. I yangucte, ngenge tapili-wawa gaibong ailu sifu nale yowa balaibelu wacne mi hegileibong. Ilec ngagegailing, nu monic ngengele haicka laliyengelebe, monicti yogo nalic mi holedaicte.’ ”

---

**3:3:** Mat 24:43-44; Miye 2:5; 16:15; 1Tim 5:2    **3:4:** Yud 23    **3:5:** Dan 12:1; Wah 32:32-33; Mat 10:32; Luk 10:2; 12:8    **3:7:** Yes 22:22  
**3:8:** 1Kor 16:9

9 “Aime ngagegaing, ngic gocne yenge Satangte kpakpaduc mackacni, yenge yengileng kwesac ailu Yuda ngic-ngigac micaigaing. Ailu yenge Yuda ngic-ngigac noine mi aigaing, miyac. Aime na kwelenedi ngengele angac ngagegabac, yogo yengi ngagemotoningte aiyelebe, yenge ngengele higewa fulu ketadi holelu alang bangeledaingte.

10 Ngenge tatakic mikac sanangne ganingte edocngebaiba, yogo noine balu gaibongte ailu lokwesac damengka mi febong na bacngebabe wasecne aidaingte. Lokwesac yogo himongtowa yagowa buchuchac ngic-ngigac yengela fikenale miicne fagac.”

11 “Na biyac fudacte. Ilec ngenge sil bad-abiyengte, yogo monicti mi banale wiyac fangelegac, ngenge yogo sanangne balu gadaing.

12 Monic ye hudu welu gbelong aidaicte, ye nani gunungkebe Wapongnele Ibu-mac kwelinele bosing sanangne aidaicte. Ailu ye Ibu-mac yogo hatacmac mi hegiledaicte. Aime na Wapongnele wac ailu Wapongnele taon sugucnele wacine, nga neicne wacne gbolicne, wac habackang yogo yele feiwa kwelengkedacte. Taon sugucne yogo Wapongnele taon, yogo Yerusalem gbolicne ailu yogo honocmengkacni nale Wapongtacni wadaicte.”

13 “Monic hedeckolec ye Asudi Yesule habufocine yowa edocebagac, yogo aneng ngagedaic.”

---

**3:9:** Miye 2:9; Yes 45:14; 49:23; 60:14    **3:10:** Luk 21:19; 2Tim 2:12

**3:12:** Yes 62:2; 65:15; Esek 48:35; Miye 14:1; 21:2

### *Laodisea habu*

14 “Ga Yesule habu Laodisea iwa gagaing, yengele angelola yowa yago kwelengkec.”

“Ngic wacine Noine, ye Wapongte yowa bal-aibecaigac. Ailu yowa noine yogolec widec aigac. Ye Wapongti wiyac sasawa mime fikeibong, yogolec fungine gagac, yedi hocne yowa yago Laodisea iwa nengele yanguc migac,

15 ‘Na aibabangineng ngageyackegabac. Nenge dacine me mogungne mi gagabiyeng. Nenge dacine sugu me mogungne sugu gaebongkabac angac ngagedaba.

16 Aime nengebac dacine me mogungne mi gagabiyeng. Nenge hewacnginac dac-dacine gagaingte ailu micnacni mengucngebanoale aigabac.\*

17 Nonge moneng-mafatowanonggengkolec ailu wiyac monicte mi kpungkelu gagabeleng, ngengilengte inguc milu sifu kwele-umactowaholec gagabiyeng. Ailu ngic-ngigac yenge nengele kwele-sowac ngagegaing. Ailu waweweine nga donge-pisic ailu sengang gagabiyeng, yogo mi ngagegabiyeng.

18 Ilec yanguc edocngebagabac, kwelele mafatowaholec ainogale nalacni gol dacti

---

**3:14:** Yes 43:10-12; 65:16    **3:15:** Rom 12:11    \* **3:16:** Taon iwa misa dongeine faibong. Misa gocne yenge dacine aime ngic-ngigac hikelu lowalu madickeibong. Nga misa gocne yenge mogungne aime ngic-ngigac hikelu balu nolu sanangkeibong. Ilec ailu dacine nga mogungne yeke momoc madicne aigaic. Nga wiyac dac-dacine yogo madicneine mi fagac.    **3:17:** Hos 12:8; 1Kor 4:8; Luk 12:21



lobeicne fuli badabiyeng.<sup>†</sup> Ailu senggang gameineholec mi ganingte ngakpi-kpoluc kwalac-kwalac balu ngakpi-kpoluckolec aidabiyeng. Ailu dongengineng hilanogale donge suwe-suwele helocti dongengineng suwenogale nalacni fuli badabiyeng.’ ”

<sup>19</sup> “Na ngic-ngigac weni yengele kwelenedi angac ngageyelecaigabac, yenge ngelengebalu edocebalu webating aieyelecaigabac. Ilec sanangkelu kwelengineng hefaliyena.

<sup>20</sup> Ngagegaing, na nuwa domalu kpong-kpong holelu gagabac. Holelu gabe monicti nale yowamalacnele hedec lolu ngagelu nu laliyeneleme, na yela febe noke momoc ngiyelu nosing momoc nodabelecte.”

<sup>21</sup> “Na hudu welu gbelong ailu febe Mamacneholec yele ngictaule ngiye-ngiyewa ngiye-caigabelec. Silicine ingucnehac monicti hudu welu gbelong aidaicte, ye nani ngictaule ngiye-ngiyene lacnobe noke momoc ngiyedabelecte.

<sup>22</sup> Monic hedeckolec ye Asudi Yesule habufocine yowa edocebagac, yogo aneng ngagedaic.”

## 4

### *Honocmengte mimi-madic*

<sup>1</sup> Inguc mime na honocmengka nu monic laliyelicne nganiiba. Hei, yowa esecne kpeng ucine ingucne yowa-malac monic edocnume ngageiba,

---

<sup>†</sup> **3:18:** Dacti gol yafoine lobeyackeme wosaeme gol noine sugu badamecte. Gol yogo kwelele wiyac madicnebenang yogolec soc holeicne. **3:18:** Yes 55:1; Miye 4:4 **3:19:** Ynn 3:11-12; 1Kor 11:32; Hib 12:6; Miye 2:5 **3:20:** Yoa 14:23

yedi yanguc miwec, “**Ga yawa ofenong. Yagolec lobeina ma pasi fikedaicte, yogo edalicgudacte.**”

<sup>2</sup> Hei, inguc mime iwahac Asudi nala bole bame nganibe honocmengka ngictaule ngiye-ngiye loicne iwa monicti yogolec feina ngiyewec.

<sup>3</sup> Yele angoc yogo posa basufaleicne, yogo posa sasacne nga posa hunga, yeke ingucne. Ailu hulilic monic posa hedonggboli ingucne, yogodi ngictaule ngiye-ngiyewa lolickelu fawec.\*

<sup>4</sup> Ailu ngictaule ngiye-ngiye ngiyeme ngictaule ngiye-ngiye gocne, dzalengineng 24, yenge ngictaule mac ngiye-ngiye yogo lolickelu ngiye-caigaing. Ngiye-ngiye yogolec feina damong 24 ingucti ngiyecaigaing. Damong yenge ngakpingineng kwalac-kwalac holelu hodocngineng feina ngictaule duu goldi baicne holelu ngiyecaigaing.

<sup>5</sup> Inguc nganicebabe pilatac bame gbululung ucine sugucnehacti ngictaule ngiye-ngiyewacni fikewec. Ngictaule ngiye-ngiyele haicka hifa 7 lobecaigaing, yogo Wapongte asu 7.

<sup>6</sup> Aime ngictaule ngiye-ngiyele haicka wiyac monic kiwec sugucne ingucne galasdi baicne, galas yogo wonongngine mikac nganiiba.

Aime ngictaule ngiye-ngiyewa neboc nga neboc 4, iwa wiyac gaganginengkolec 4 yengi hewalingkelu domacaigaing. Yenge emengineng nga lobengineng sasawa yogo dongedi wakeyackeicne.

---

**4:1:** Dan 2:28-29; 7:9; Wah 19:16-19; Miye 1:1,10      **4:2:** Yes 6:1

**4:3:** Esek 1:26,28      \*      **4:3:** Posa wacngineng yogo yanguc, yaspa, kanelian, nga emeral.      **4:4:** Dan 7:10; Miye 3:18      **4:5:** Esek 1:13; Sek 4:2; Miye 1:4; 8:5; 11:19; 16:18      **4:6:** Dan 7:2-3; Esek 1:5-10,22; 10:14

<sup>7</sup> Wiyac gagaineholec molic-molic, yele ngani-nganiine laion ingucne. Aime yele lobeina, wiyac gagaineholec monic ye bulumaka ngicne tapiliineholec ingucne. Aime yele lobeina wiyac gagaineholec monic, ye haic-mesuine ngani-nganiine ngic ingucne. Aime moto-motoina wiyac gagaineholec monic, ye hikic sugucnedi filalangkecaigac, ingucne aiwec.

<sup>8</sup> Wiyac gaganginengkolec 4 yenge filesoc filesoc kwenggelengngineng 6. Ailu socngineng sasawa yogo dongedi saweyackeicne. Ailu kwenggelengngineng bageina yogo inguchac dongeholec. Ailu yenge hadeng nga debocsoc ngiye-ngagec mikac yanguc milu gacaigaing, “Sugucne Wapong Tapilitowa Fileine, Ye gbagbacnedi, gbagbacne, ailu gbagbacne. Ye gawec nga gagac ailu gacgu kwesinowagac.”

<sup>9</sup> Aime ngictaule mac ngiye-ngiyeina ngiyecaigac, ye gaga-sanang gaginowagac. Aime wiyac gaganginengkolec yenge yele wac bafelu alang bacnolu kwele-madic micaigaing. Inguc micaigaingka,

<sup>10</sup> ye ngictaule ngiye-ngiyeina ngiyecaigac, ailu gaga-sanang gaginowagac, damong 24 yenge yele higewa ketadi holecaigaing. Holelu ye afeelu ngictaule duungineng bamoctolu ngictaule ngiye-ngiyeinele emeina wickebong wame yanguc mi-gaing,

<sup>11</sup> “Ga Sugucne ailu Wapongnonggeng. Gagi wiyac sasawa miyengka fikeyackelu gaganginengkolec fagaing.

Gageuc ngagelu inguc bafuwayackeingte, ga andoine. Ilec ailu wac feicne nga alang-baba ailu tapili sasawa badamecte.”

## 5

### *Hibi kpadidiweicne*

<sup>1</sup> Wapong ngictaule ngiye-ngiyeina ngiyecaigac, ye hibi kpadidiweicne monic mole-foleina balu ngiyegac. Aime hibi yogo kwelina nga lobina kweleng kwelengkeicne fagac. Aime iwa yoc sopiyaine 7 ingucnedi bakatackelu kpakpatalac aka loicne nganiiba.

<sup>2</sup> Na angelo monic tapiliineholec nganibe yedi malac sugucnehac yanguc aukwelu wackewec, “Hibiwa yoc sopiyainedi aka lolu bakatackeicne yogo madi nalic baickelu bafilamenale silicine ngagegac?”

<sup>3</sup> Wackeme basackebong honocmengka me himongka me himong bageina monicti hibi kpadidiweicne yogo nalic mi bafilamedaicte, me kweleng yogo ngani-nganilesoc mi fagac.

<sup>4</sup> Aime monicti hibi yogo bafilamelu nganinogalesoc nalic mi aiwecte ailu, kwelene sowaleme hiyaiba.

<sup>5</sup> Hiyabe damongfocngineng yengelacni monicti yanguc edocnuwec, “Ngagegic, ga mi hiyanong! Yuda yengelacni laion yogo, ye Dawidi ngambofocine yengele fikesaweckacni gidec, yedi gbelong aiwec. Ilec ailu ye hibi kpadidiweicne

yele aka 7 bakatackeicne, yogo nalic baickelu bafilamedaicte.”

### *Lama madecine*

<sup>6</sup> Inguc mime yanguc nganiiba. Ngictaule ngiye-nyiye nga wiyac gaganginengkolec 4, ailu damong 24 yengele hewacka Lama madecine monic domawec, ailu ye webong homaicne ingucne aiwec gagac. Lama madecine yogo ye begicine 7 ailu dongeine 7. Dongeine yogo Wapongte asu 7, yenge Wapongti himongka salecebame gagaing.

<sup>7</sup> Yedi hocne lelu ngictaule ngiye-nyiyewa ngiyewec, yele mole-foleinacni hibi kpadidiweicne yogo bawec.

<sup>8</sup> Hibi yogo balu domame, wiyac gagangi-nengkolec 4 nga damong 24 yenge yele haicka ketadi holeibong. Damong sasawadi gita mucine homacne, ailu pele goldi baicne yogo filesoc balu domaibong. Pele yogowa marasing hoine madicne fawec. Fame marasing hasockolec pelewacni ofewec, yogo Wapongte bingec yengele mimilocngineng, yogodi pelengineng wakeyackeicnedi ofelu fawec.

### *Lama madecine afeeibong*

<sup>9</sup> Aime yenge gee monic gbolicne yanguc holeibong.

“Gagi hibi kpadidiweicne yogo nalic balu aka bakatackeicne yogo baickedamecte. I yangucte, ngic yengi wecgubong gagi sacgonedi ngic-ngigacfocgone fuli bacebaing.

Ailu ga himong fengnginang fengnginangsoc ngic-ngigac, nga yowane yowane, ailu soc haicine monic-monic, nga himongne himongne ngic-ngigac sasawa, yengelacni moniyang moniyang fuli bacebang Wapongte aling ailu gagaing.

<sup>10</sup> Fuli bacebang Wapongte ngani-damongte alingka gadaingte.

Ailu yenge depec-baba ngic ingucne ailu Wapong kwelec kwecnodaingte.

Aling yogo yengi himongne himongne yengele damong aidaingte.”

<sup>11</sup> Na dongene lokeme nganibe angelo bocyac yengele dzalengineng yogo 100 milion ewaligac. Ailu taosen nga taosen hatacmac feina taock-egaing. Yengi ngictaule ngiye-ngiye nga wiyac gaganginengkolec, ailu damong 24 hewalinge-babong, yowa-malacngineng ngageiba.

<sup>12</sup> Yengi sanangne wackelu aukwelu yanguc mi-ibong,

“Lama madecine wehomaicne,

Yedi damongte tapili nga woc-wiyactowa ailu ngage-ngage-motoc, nga tapili ailu alang-baba, nga wac feicne ailu mimi-madic yogo nalic lacnobong badaicte.”

<sup>13</sup> Aime wiyac sasawa Wapongti mime fikeyack-eibong, yenge honocmengka nga himongka ailu himong bageina nga kiwecka, yengele kweliwa wiyac sasawa gagaing, yenge yowa yanguc mi-bong ngageiba.

---

**5:9:** Mige 33:3; 40:3; 96:1; 98:1    **5:10:** Dan 7:18,22,27; Wah 19:6; Yes 61:6; Miye 1:6; 20:6    **5:11:** Dan 7:10; Hib 12:22    **5:12:** 1Ngsi 29:11-12

“Ye ngictaule mac ngiye-ngiyeina ngiyegac nga  
Lama madecine,  
Yekela mimi-madic nga alang-baba, ailu wac  
feicne nga tapili moto-motoine mikac  
fafegidaic.”

<sup>14</sup> Inguc mibong wiyac gaganginengkolec 4 yengi  
“yogo foinac” miibong. Aime damong 24 yenge  
ketadi holecnolu yeke afecepaibong.

## 6

### *Yoc sopiyainedi aka bakatackeicne baickewec*

<sup>1</sup> Na nganibe Lama madecinedi kpakpatalac  
aka 7 bakatackeicne fawec, yogo molic-molic  
moniyang hibiwacni baickewec. Aime wiyac  
gaganginengkolec 4 yengelacni monicti yowa-  
malacine gbululung ucine ingucnedi wackelu  
aukwelu yanguc mime ngageiba, “Ga welec!”

<sup>2</sup> Hei, inguc mime na hilalu becosic kwalac-  
kwalac monic nganiiba. Aime yele feiwa wiyac  
monicti lebeineholec ngiyewec. Monicti ngictaule  
duu monic lacnowec. Aime ye holelu becosicka  
hikelu huduwa ewalicebalu gbelong ainogale ai-  
wec.

<sup>3</sup> Aime Lama madecinedi aka bakatackeicne  
monic hatacmac baickewec, iwa ngagebe wiyac  
gagaineholec monicti yanguc miwec, “Ga welec!”

<sup>4</sup> Inguc mime becosic monic sasacnedi kwesi-  
wec. Yele feiwa wiyac monic ngiyewec, mon-  
icti wiyac gocne lacnowec. Ye kwele-mogung  
baic-baicte tapili ailu himongne himongne ngic-  
ngigac yengungtihac wehomacnaguningte tapili

yogo lacnowec. Ailu monicti hudu-babale fitec sugucne monic lacnowec.

<sup>5</sup> Aime Lama madecinedi aka bakatackeicne monic baickeme alecine habackang aiwec. Baickeme wiyac gagaineholec 3 yedi yanguc mime ngageiba, “Ga welec!” Hei, inguc mime becosic saec-saec monic nganiiba. Aime wiyac monic yele feiwa ngiyewec, ye sigel monic moleina balu ngiyewec. <sup>6</sup> Aime wiyac gaganginengkolec 4, yengele hewackacni yowa-malac ingucne monicti yanguc mime ngageiba, “Nosing lolocte dameng aime wit lita moniyangte fuli, yogo sugucnehac hadeng moniyangte bole-fuli aigac. Nga bali lita habackang, yogo hadeng moniyangte bole-fuli aigac. Aime ga heloc nga waing mi basowaledamec.”\*

<sup>7</sup> Lama madecinedi aka bakatackeicne monic baickeme alecine 4 aiwec. Baickeme ngagebe wiyac gagaineholec 4 yedi yanguc miwec, “Ga welec!”

<sup>8</sup> Hei, inguc mime becosic dagec-dagec monic nganiiba. Aime wiyac yele feiwa ngiyewec, wacine Homac. Ye wiyac monic wacine Wangecmac, ye mengockeme kwesiiboc. Kwesilu yeki himongtowa habu 4 iwacni heuckelu iwa nebocine yogo yeki hudu-babale fitec nga loloc ailu huc nga himongte kate-sic bacebaboc kwesidaingte. Kwesilu wiyac yogo yengi ngic-ngigac wecebabong homadaingte, yogolec tapili yeke yeteicne.

---

**6:4:** Esek 21:9-15

\*

**6:6:** Grik yowawa moneng monic wacine denarius kwelengkeicne. Yoanele damengka moneng yogo moniyangti hadeng moniyangte fuli aiwec. Bali yogo padi ingucne nosing monic. **6:8:** Yer 15:1-3; Esek 5:12,17; 14:21



<sup>9</sup> Aime Lama madecinedi aka bakatackeicne monic baickeme alecine 5 aiwec. Baickeme iwa yanguc nganiiba. Ngic-ngigac Wapongte yowa bagalu mibong yegengkeme wecebabong homaibong, yengele ilucfocngineng alata bageina ngiyeibong.

<sup>10</sup> Yenge iwa ngiyelu dacineholec aukwelu yanguc wackeibong, “Oc, Sugucnenonggeng, ga gbag-bacne gaga nga yowa noinele fileine. Ga ameine badu-badule dameng badaliwelu sacnonggengte bikic yogolec ngagelu ngic himongka galu wec-nubaibong, yenge ma damengka mimoctocebalu bikicnginengte ameine yeledamecte?”

<sup>11</sup> Inguc mibong ngakpi dalicne kwalacne filesoc yelevu yanguc edocebawec, “Gocne yengi ngenge wecnegebabong homaibong, silicine ingucnehac kwelec kwekwe agofocngineng, yenge ngic hae-gbafocngineng aigaing, yenge momochac wecebabong homadaingte. Homabong dzalengineng ngageibawa feholeme motodaicte. Ilec ngenge kpisicnemas hatacmac ngiye-ngagedaing.”

<sup>12</sup> Aime ye aka bakatackeicne monic baickeme alecine 6 aiwec. Baickeme nganibe memeya sugucnehac bame wenac-dongeine saeckewec, yogo kwele-sowacte ngakpi saecne ingucne aiwec. Aime tamacne ye bucbuchac sac ingucne aiwec.

<sup>13</sup> Aime gbelong sugucnedi welu fik yoc hucine manggangne yockacni wemolongkeme

wacaigaing, silicine ingucnehac asocmeng sawawa fagaing, yenge himongka molongkelu waibong.

<sup>14</sup> Wabong ngicti hibi kpadidiwecaigaing, silicine ingucnehac sawa ye kpadidiwelu miyac aiwec. Miyac aime tiki nga nuc sasawadi mac ngiye-ngiyengineng hegileyackeibong.

<sup>15</sup> Inguc aime himongte ngictau nga ngic sugucne ailu hudu-baba ngic yengele damong. Nga ngic mafatowanginengkolec ailu ngic sanangne, nga kwelec kwekwe aling sugucnefocngineng yengele bagewa gaibong, ailu ngic-ngigac ngic monicte bagewa mi gaibong. Yenge sasawadi hikelu henebe kwelina, nga posa sugucne sugucne bagenginang sangkeyackeibong.

<sup>16</sup> Sangkelu yengi tiki nga posa yanguc edocebaibong, “Ngenge feinonggang walu Wapongti ngictaule ngiye-ngiyewa ngiyegac, yele haicka nga Lama madecinele aalicta ameine iwacni somec-nubadabiyeng.

<sup>17</sup> I yangucte, yekele aalicta amenginecte damengtowa biyac kwesigacte, madi sanangkelu domadaicte? Monicti nalic mi domadaicte!”

## 7

### *Ngic dzalengineng 144 taosen*

<sup>1</sup> Inguc nganibe motome angelo 4 nganicebaiba. Yenge himongtowa yagolec unggulucine 4, iwa domaibong. Aime nganicebabe yenge himongte gbelong 4 balu sebilelu domaibong, gbelong yogo

yenge himongka me kiwecka me yocka nalic mi wedaingte.

<sup>2</sup> Aime angelo 4 yenge himong nga kiwec basowalecepaningte tapili yeleicne. Aime na angelo monic nganiiba. Ye Wapong gagaineholec yele akale maa bagalu wenac ofe-ofeinacni kwesiwec. Yedi angelo 4 yenge wacebalu yanguc miwec,

<sup>3</sup> “Ngenge himong me kiwec me yoc biyac mi basowalecebadabiyeng. Nonge Wapongnonggenge kwelec kwekwefocine yengele meiwa akale maa loyalebeng wacne aibong ibac ngenge wiyac sasawa basowalecebadabiyeng.”

<sup>4</sup> Aime ngic yengele meiwa akale maaholec, yengele dzalengineng 144 taosen mibong ngageiba. Akale maaholec yogo yenge Israel madefocine 12 yengele habuwacni.

<sup>5</sup> Yengele meiwa akale maaholec yengele dzalengineng yanguc,

Yudale fikesaweckacni 12 taosen,  
Rubente fikesaweckacni 12 taosen,  
Gatle fikesaweckacni 12 taosen.

<sup>6</sup> Asele fikesaweckacni 12 taosen,  
Nafatalile fikesaweckacni 12 taosen,  
Manasele fikesaweckacni 12 taosen.

<sup>7</sup> Simeonte fikesaweckacni 12 taosen,  
Liwaile fikesaweckacni 12 taosen,  
Isakale fikesaweckacni 12 taosen.

<sup>8</sup> Sebulunte fikesaweckacni 12 taosen,  
Yosefele fikesaweckacni 12 taosen, nga  
Benyaminte fikesaweckacni 12 taosen.

*Habu sugucnedi Wapong afeeibong*

<sup>9</sup> Hei, inguc nganibe motome habutowabenang nganicebaiba. Aime yengele dzalengineng yogo monicti nalic mi wafedaicte. Ngic-ngigac nganicebaiba, yenge himongne himongne yogowacni, nga himong fengnginang fengnginangsoc ngic-ngigac ailu soc haicine monic-monic, nga yowane yowane, yengelacni. Ailu yenge ngakpingineng dalicne kwalac-kwalac holelu molenginang kpongngeng leso balu ngictaule ngiye-ngiyewa nga Lama madecinele haicka domaibong.

<sup>10</sup> Domalu yanguc milu sugucnehac aukwelu wackeibong,  
 “Wapongnonggeng ngictaule ngiye-ngiyewa ngiyegac, ailu Lama madecine, ngekele tapiliwa baficnubaboc wasecne gagabeleng.”

<sup>11</sup> Inguc mibong angelo sasawadi domalu ngictaule ngiye-ngiye nga damong 24 ailu wiyac gaganginengkolec 4 hewalingebaibong. Angelo yenge ngictaule ngiye-ngiyele haicka wafalu ketadi holecnolu haicngineng heluluckelu Wapong afeeibong.

<sup>12</sup> Afeelu yanguc miibong,  
 “Foinac, mimi-madic nga wac feicne, ailu ngage-ngage-motoc nga kwele-madic ailu alang-baba nga damongte tapili ailu tapilitowa yogo sasawa Wapongnonggengte aigac. Yogo damengsoc damengsoc damengngine moto-motoine mikac fafegidaic, yogo foinac.”

*Doic sugucnebenang motowec*

<sup>13</sup> Inguc mibong, damong yengelaicni monicti yanguc uwanelewec, “Ngic-ngigac ngakpingineng dalicnedi kwalac-kwalac yago, yenge weni yengi ailu yenge wenuwacni kwesigaing?”

<sup>14</sup> Uwaneleme ameine yanguc edoiba, “Suguc-nene, gageuc ngagegic.”

Inguc mibe yedi yanguc edocnuwec, “Ngic-ngigac yago yenge doic sugucnebenang yogowacni kwesilu ngakpingineng dalicne Lama madecinele sacti suwebong kwalac-kwalac aigac.

<sup>15</sup> Ilec ailu yenge deboc hadeng Wapongte Ibu-mac kwelina ngictaule ngiye-ngiyele haicka do-malu ye afeelu kwelec kwecnolu gagaing. Babong Sugucne ngictaule ngiye-ngiyewa ngiyegac, ye yengeholec galu kpoluc-faleine yengele feiwa lome ngiyedaicte.

<sup>16</sup> Aime yenge nosingte hatacmac mi homadaingte. Ailu misale mi aiyedaicte. Ailu wenac me wiyac gocnedi socngineng hatacmac mi kweme malawedaingte.

<sup>17</sup> I yangucte, Lama madecine ngictaule ngiye-ngiyele hewacka domagac, yedi damongebalu gagale misa dongeina mengocebalu hikeme nodaingte. Aime Wapongti donge-misangineng sasawa suweyackedaicte.”

## 8

### *Aka bakatackeicne moto-motoine baickewec*

<sup>1</sup> Lama madecinedi aka bakatackeicne moto-motoine baickeme alecine 7 aiwec. Baickeme iwa

---

**7:14:** Dan 12:1; Mat 24:21      **7:15:** Wah 19:6,10; Esek 37:26-28

**7:16:** Yes 49:10      **7:17:** Mige 23:1-2; Yes 25:8; Miye 21:4

honocmengka 30 minit ngama ingucne hendolong mikac ningbenang kwelu fawec.

<sup>2</sup> Ning kweme angelo 7 Wapongte haicka domacaigaing, monicti yenge kpeng 7 yeleme nganicebaiba.

<sup>3</sup> Aime angelo monicti pele goldi baicne yogo bakwesilu alata emeina lelu domawec. Domame monicti marasing hoine madicne bocyac lacnowec. Lacnome yogodi Wapongte bingec sasawa yengele mimilockolec kpatulelu alata goldi baicne ngictaule ngiye-ngiye emeina domawec, iwa lolu hasoc holewec.

<sup>4</sup> Ye inguc aime ye le molewacni hasoc hoine madicnedi Wapongte bingec yengele mimilockolec kpatulelu Wapongta fewec.

<sup>5</sup> Feme angelo ye alatawacni dac balu peleina kweme haulu wakeme himongka wickeme sotingkelu wawec. Wame gbululung holeme uc sugucnehac fikewec. Ailu pilatac bame memeya bawec.

### *Angelo 4 yenge kpengnginengkolec*

<sup>6</sup> Bame angelo 7 kpengnginengkolec yenge kpeng fitonogale efeckeibong.

<sup>7</sup> Efeckeibong angelo molic-molic yedi kpeng fitome mac hucine sanangkeicne\* nga dac sackolec kpatulelu himongka wickeme sotingkelu wawec. Wame himongtowa habu sugucne yogowacni habackang heuckelu iwacni nebocine lobewec.

---

**8:1:** Hab 2:20; Sek 2:13; Sef 1:7      **8:3:** Miye 5:8; 6:9-11; Wah 30:1-3      **8:5:** Dep 16:12; Wah 19:16-19; Miye 11:19; 16:18

\* **8:7:** Himong mogungna mac hucine sawawa mogungkelu posa ingucne sanangkelu wacaigaing.

Ailu yoc sasawa himongtowa yogolec feina doma-gaing, yenge habu sugucne yengelacni habackang yogowacni heuckelu iwacni nebocine lobewec. Ailu kpinding sasawa dacti lobeyackewec.

<sup>8</sup> Aime yele lobeina angelo 2 yedi kpeng fitome monicti tiki sugucne dacineholec ingucnedi kiwecka wickeme wame kiwec habu sugucne yogowacni habackang heuckelu iwacni nebocine sac aiwec.

<sup>9</sup> Aime kiwecka sic gaganginengkolec gagaing, habu sugucne yogowacni habackang heuckelu iwacni nebocine homayackeibong. Ailu wage aling sugucne yogowacni habackang heuckelu iwacni nebocine sowalelu miyac aibong.

<sup>10</sup> Aime yele lobeina angelo 3 yedi kpeng fitome sawawacni asocmeng sugucne monic hifa ingucne lobelu motolu wawec. Wame misa sugucne nga misa dongeine yenge habu sugucne yogowacni habackang heuckelu iwacni nebocinele feina holewec.

<sup>11</sup> Asocmeng yogo wacine Hobecine. Aime misa habu sugucne yogowacni habackang heuckelu iwacni nebocine yogo hobecine aiwec. Aime misa hobecine aiwecte ailu ngic-ngigac bocyacti nolu homaibong.

<sup>12</sup> Aime angelo 4 yedi kpeng fitowec. Fitome wenac nga tamacne ailu asocmeng yengele angocte tapili yogo aling habackang heuckelu iwacni nebocine kundung kwenale baickewec. Baickeme hadengte dameng yogowacni

habackang heuckelu iwacni nebocinedi mi angoleibong. Aime deboc ye inguchac aiwec.

<sup>13</sup> Aime nganibe hikic monic sawa hewacka wileng filalangkeme yowa-malacine ngageiba. Yowa yogo sugucnehac wackelu yanguc miwec, “Mee, mee, mee, angelo habackang yenge kpeng fitobong ucngineng sugucnehac hiyabong yowale umac habackang ngagedaingte. Ilec ngic-ngigac himongka gagaing, ngenge medecgebadaic.”

## 9

### *Angelo 5 yedi kpeng fitowec*

<sup>1</sup> Angelo 5 yedi kpeng fitome na asocmeng monic honocmengkacni walu himongka holewec yogo nganiiba. Nganibe monicti long sugucnebe-nang hauyackeicne, yogolec yefeinele ki asoc-meng lacnowec.

<sup>2</sup> Lacnome yedi ki yogo balu long sugucnebe-nang yogo bamoctowec. Bamoctome dacti bole lobeme hasoc sugucnehac fecaigac, hasoc silicine ingucnedi longkacni ofewec. Long iwacni hasoc ofelu wenac nga sawa hedicepame kundung kweiboc.

<sup>3</sup> Aime hasockacni ipowa ofelu himongka wai-bong. Wabong monicti himongte wame-wame yengele tapili ingucne yenge yelevu

<sup>4</sup> yanguc edocebawec, “Ngenge kpinding nga wiyac sasawa hekengngineng sabaineholec fagaing, ailu yoc mi basowalecebadabiyeng. Ngenge ngic-ngigac Wapongte akale maa

---

**8:12:** Wah 10:21-23; Esek 32:7; Miye 6:12-13      **8:13:** Miye 9:12; 11:14      **9:1:** Luk 10:18; Miye 20:1      **9:2:** Fike 19:28; Yol 2:2,10; Wah 10:12-15



yengele meiwa mi balu gagaing, yenge sugu basowalecebadabiyeng.

<sup>5</sup> Ngenge tamacne 5 iwa doic sugu yeledaing. Ailubac yenge mi homadaing.” Aime wame-wamedi hicebame doic ngagecaigaing, doic ingucne aidaicte.

<sup>6</sup> Dameng iwa ngic-ngigac yenge homanogale homac basackelu aibibiyedaingte. Ailu homanogale aiyeledaicte. Aimebac homacti yenge hegilecebadaicte.

<sup>7</sup> Aime ipowa yenge ngani-nganingineng hudu-babale becosic yenge ingucne. Hodocnginang duu goldi baicne ingucne ngiyewec. Nga haic-mesuningineng yogo ngic-ngigac yengele haic-mesu ingucne.

<sup>8</sup> Aime hodoc-dowecngineng yogo ngigac yengele ingucne. Ailu mic-luwengineng yogo laion yengele mic-luwe ingucne.

<sup>9</sup> Ailu maleku holeibong, yogo aenti ngakpi ingucne baicne. Aime kwenggelengngineng ucine yogo becosic bocyacti hudule gasackelu keleta fuluckelu ucineholec hikecaigaing ingucne.

<sup>10</sup> Ailu gicngineng micineholec yogo wame-wame gicngineng ingucne aiwec. Aime yenge ngic-ngigac basowalecebanogale tapilingineng yogo tamacne 5 yogolecsoc fadaicte. Aime tapilingineng yogo gicnginang ngiyewec.

<sup>11</sup> Long sugucnebenang, yogolec angelodi\* yengele ngictaungineng gawec. Yele wacine yogo Hi-

---

**9:4:** Miye 7:3    **9:6:** Yop 3:21; Yer 8:3    **9:7:** Yol 2:4    **9:8:** Yol 1:6    **9:9:** Yol 2:5    \* **9:11:** Satang ye angelo monic. Ilec ye angelo yogo mecne. Ailu 9:1 iwa asocmeng monic wawec, yogo ye mecne.

bru yowawa Abadon, nga Grik yowawa Apolion.†

<sup>12</sup> Mee, yowale umac molic-molic yogo motogac. Ngagegaing, yogolec lobeina, yowale umac yaeckangti kwesidabiyecte.

*Angelo 6 yedi kpeng ftowec*

<sup>13</sup> Aime angelo 6 yedi kpeng fitome Wapongte haicka alata goldi baicne, yogolec unggulucina begic 4, yengelacni mic-yowa monic ngageiba.

<sup>14</sup> Ngagebe yedi angelo 6 kpengineholec yanguc edowec, “Angelo 4 Yufretis misa sugucne mecina witicebabong domagaing, yenge lukecebanong.”

<sup>15</sup> Angelo 4 yenge ngic-ngigac habu sugucne yogowacni habackang heuckelu iwacni nebinecine wehomacebanogale efeckeibong. Efeckebong dameng nga hadeng ailu tamacne nga hifa-dameng yogolec efeckelu gabong yedi lukecebawec.

<sup>16</sup> Aime yengeholec hudu-baba ngic becosic feina ngiyeibong, yengele dzalengineng 200 milion mibong ngageiba.

<sup>17</sup> Aime gungka ingucne dongene lokeme nganibe hudu-baba ngic becosicnginengkolec yengele silicngineng yanguc nganiiba. Yenge ngakpingineng aenti baicne yogo hibine sasacne dac ingucne ailu sowac-sowac nga dagecdagec, yogo posa wacine salfa ingucne. Nga becosicte hodoc yogo laion ingucne. Aime micnginangkocni dac nga hasoc ailu salfa-posadi ofelu hikeibong.

---

† **9:11:** Apolion wac yogolec fungine yogo, ye kindololo ngic.

**9:11:** Wah 12:23    **9:15:** Miye 8:7-12    **9:17:** Fike 19:24,28; Esek 38:22

18 Doic habackang, dac nga hasoc ailu salfa-posa ubilangineholec, yenge becosic micnginangkocni ofelu ngic-ngigac habu sugucne yogowacni habackang heuckelu iwacni nebocine wehomacebaibong.

19 Tapili yogo becosic micnginang nga gicnginang ngiyewec. Aime gicngineng yogo yenge hema ingucne hodocnginengkolec. Ailu yenge yogodi wiyac haicine monic-monic basowale-caigaing.

20 Aime ngic-ngigac nebocine doic yogodi mi wehomacebaibong, yenge moledi aibaba gocne balu gaibong, aibabangineng yogolec kwelengineng mi hefaliyeibong. I yangucte, yenge aleng nga siduc-gbong yogo gol, siliwa, kopa, nga posa, ailu yocti baicne alang bayelelu afeebaningte aibaba yogo mi hegileibong. Siduc-gbong yogo molenginengti baicne. Ailu siduc-gbong ingucne yenge wiyac monic mi nganidaingte. Nga hedecnginengti yowa monic mi ngagedaingte. Ailu hinggengingti nalic mi edelu hikedaingte.

21 Aime ngic-ngigac yogo yengi ngic-ngigac gocne wecebabong homaibong. Ailu hefec nga mosoc aibaba, ailu selo-boic aibaba nga hise aibaba, yogo sasawa bagalu kwele-hefaliyec monic mi aibong.

## 10

### *Angelo monic nga hibi kpadidiweicne*

<sup>1</sup> Aime na angelo tapiliineholec monic nganibe honocmengkacni wawec. Ye kaguwadi ebeckeicne. Aime hodocina hulilic ngiyewec. Nga haic-mesuine yogo wenac-dongeine ingucne ailu higekecine yeke bosing ingucne dac-ubilangkolec.

<sup>2</sup> Ailu ye hibi kpisicne monic kpadidiweicne yogo biyac bafilameicne moleina balu domawec. Domalu hige foleine yogo kiwecka nga kanaine yogo himongka lowec.

<sup>3</sup> Lolu laionti aukwecaigac, silicine ingucnehac dacineholec aukwewec.

Aukweme gbululung 7 yenge mic ucnginengkolec yowa miibong.

<sup>4</sup> Inguc mibong kwelengkenogale aibe, honocmengkacni mic-yowa monicti yanguc milu edocnume ngageiba, “Gbululung 7 yowa migaing yogo mi kwelengkec. Yogo ngage-ngagegona loengka fadaic.”

<sup>5</sup> Inguc mime angelo biyachac nganiiba, yedi kiwecka nga himongka domalu mole-foleine honocmengka haic bafangkewec.

<sup>6</sup> Bafangkelu mimipang sanangne yanguc miwec, “Sugucne gagac nga gaginowagac, yedi mime sawa nga himong ailu kiwec nga yengele kwelinginang wiyac sasawa fagaing, yogo fikeyackeibong. Na yele wac wackelu yowane basanangkelu yanguc migabac, ‘Ye wangec hatacmac mi aidaicte.’

<sup>7</sup> Wapongti kwelec kwekwefocine, yenge siduc-mimi ngicfocine gagaing, yenge yeicne ngage-ngage sangkeicne yogo biyachac mime yegengkeyelewec. Aime angelo 7 yedi kpeng

---

**10:1:** Miye 5:2-3; Esek 1:26-28

**10:3:** Mige 29

**10:4:** Dan 12:4,9

**10:5:** Yef 32:40; Dan 12:7

fitonogale aidaicte, dameng yogowa ngage-ngage sangkeicne yogo noine fikeme motodaicte.”

<sup>8</sup> Aime molickelu mic-yowa honocmengkacni ngageiba, yedi hatacmac milu yanguc edocnuwec, “Ga lelu angelo kiwecka nga himongka domagac, yele molewacni hibi bafilameicne, yogo badamec.”

<sup>9</sup> Inguc mime na angelola lelu hibi kpisicne bafilameicne yogo nelenale edoiba.

Edobe yedi yanguc miwec, “Ga balu noc. Aime yogodi micgona begeg misaine ingucne angacine aidaicte. Nga gobegona haumebac gobe hihi aigeledaicte.”

<sup>10</sup> Inguc mime na angelole molewacni hibi kpisicne bafilameicne yogo balu nobe micnabac begeg misaine ingucne angacine aiwec. Nga gobena haumebac gobe hihi aineleme

<sup>11</sup> yanguc edocnuibong, “Ga ngic-ngigac soc haicine monic-monic, nga himongne himongne, ailu yowane yowane, nga ngictau bocyac yengela wiyac fikedaicte, yogolec Wapongte siduc-yowa\* hatacmac midamec.”

## 11

### *Ngic yaeckang yeki yowa miboc yegengkewec*

<sup>1</sup> Aime monicti kpetele maa monic yogo kumicnang muc ingucne nelelu yanguc edocnuwec, “Ga fangkelu Wapongte Ibu-mac nga alatale maa

---

**10:7:** Amo 3:7      **10:9:** Esek 2:8-3:3      \* **10:11:** Wapongte siduc-yowa yogo hibi kpisicne bafilameicne iwa fawec. Yowa yogo angacine nga gobe hihineholec momoc aidaicte.

balu ngic-ngigac yogowa Wapong afeecaigaing, yengele dzalengineng momoc badamec.

<sup>2</sup> Ailu Ibu-macte sobeng odaineholec fagac, yogo Israel yengele alingkacni miyac yenge ye-icne. Ilec ailu ga sobeng yogolec maaine mi badamec. Yengi tamacne 42le kwelina taon gbag-bacne\* yogo edesockelu basowaledaingte.

<sup>3</sup> Dameng iwahac na wideckecne tapili yetebe yeki kwele-sowacte ngakpi holelu hadeng 1 taosen 260le† kwelina nale siduc-yowa midabiyecte.”

<sup>4</sup> Yeke oliwa yoc yaeckang, nga Sugucne himongtowa bafuwawec, yele haicka hifa higeineholec yaeckang ingucne domagabiyec.

<sup>5</sup> Ngic gocne yengi yeke basowalecepanogale ngagedaingtewa, dacti yekele mickacni ofelu ngabafocnginec lobecebame homadaingte. Ailu hatacmac mibe, monicti yeke basowalecepanogale ngagedaictewa, ye inguc hocne homadaic.

<sup>6</sup> Wideckecne yeke yowa-siduc milu gaboc sawawa wileng hedickeme mac monic mi kwedaicte, yeke bole-yowa yogo tapiliineholec balu gagaic. Ailu yeke yekuhuctihac miboc misadi hefaliyelu sac ainale bole-yowa tapiliineholec balu gagaic. Ailu yeke yekilec angacte doic haicine monic-monic himongka loyelenicte bole-

---

**11:1:** Esek 40:3; Sek 2:1-2      \* **11:2:** Ibu-mac Yerusalem iwa domawecte taon gbagbacne wackeibong.      **11:2:** Luk 21:24; Miye 13:5      † **11:3:** Hadeng 1 taosen 260 tamacne 42 aigac. Nga tamacne 42 yogo hifa habackang nga nebocine aigac.      **11:4:** Sek 4:2-3,11-14; Miye 1:20; Yef 19:15      **11:5:** 2Sm 22:9; Mige 97:3

yowa tapiliineholec ingucnehac balu gagaic.

<sup>7</sup> Aime yeke fungine miboc yegengkeme edo-  
cebayackeboc motome, hudu-baba-sicti long sug-  
ucnebenang, yogolec kwelinacni ofelu yekeholec  
wenagulu yeke huduwa ewalicepalu wehoma-  
cepadaicte.

<sup>8</sup> Wehomacepalu kponggbongnginec yogo taon  
yefeina locepame fadabiyecte. Taon sugucne yo-  
golec wacine nangeng yowa holelu Sodom nga  
Isip micaigaing. Aime mac iwa hocne Suguc-  
nenonggeng malicponka webong homawec.

<sup>9</sup> Aime hadeng habackang nga hadeng monic  
nebocine yogowa ngic-ngigac soc haicine monic-  
monic, nga himong fengnginang fengnginangsoc  
ngic-ngigac. Ailu yowane yowane nga himongne  
himongne ngic-ngigac yenge yekele kponggbong  
nganilu longepadaingkale, kpatalayeledaingte.

<sup>10</sup> Kpatalayelebong ngic-ngigac himongte wiy-  
acka wetackelu gagaing, yenge sasawadi angac  
nga kwele-madic ngagelu kwele-madicte woc-  
wiyac gocne lanagudaingte. Siduc-mimi ngic  
yaeckang yeke ngic-ngigac yogo doicka locebai-  
bocte inguc aiyetedaingte.

<sup>11</sup> Aime hadeng habackang nga hadeng monic  
nebocine motome, gagale asudi Wapongtacni  
kwesilu yekela haume yeke hatacmac fangkeli  
domaiboc. Domaboc nganicepalu yenge damue-  
bame hangoc sugucnehac aibong.

<sup>12</sup> Aime honocmengkacni yowa-malac monic  
yanguc edocepame ngageiboc, “Ngeke yawa

---

**11:6:** 1Ngt 17:1; Wah 7:17-20; 1Sm 4:8      **11:7:** Dan 7:7,21; Miye  
12:17; 13:7; 17:8      **11:8:** Luk 13:34      **11:9:** Mige 79:2-3      **11:11:**  
Esek 37:5,10

ofenic!” Inguc mime ngabafocnginec yenge yeke nganicepabong kaguwa kwelina honocmengka feiboc.

<sup>13</sup> Feiboc dameng iwahac memeya sugucnehac bame taon yogolec nebocine 10 iwacni nebocine moniyang siyeckewec. Memeya sugucne bawec, yogolec kwelinacni ngic-ngigac dzalengineng 7 taosen yenge homaibong. Homabong ngic-ngigac nebocine yenge hangocebame Wapong honocmengka gagac, yele wac bafeibong.

<sup>14</sup> Mee, yowale umac alecine yaeckang yogo motogac. Yanguc ngagedaing, yogolec lobeina, yowale umac moniyangti sugu fagac, yogo biyac fikedaicte.

*Angelo 7 yedi kpengine fitowec*

<sup>15</sup> Aime angelo 7 yedi kpeng fitome honocmengkacni yowa-malac sugucne yanguc miibong, “Yakumac Sugucnenonggeng nga Kristo bawosaeicne, yeki himongtowale ngani-damong yogo balu damongkelu gagaic.

Ailu Sugucnenonggengti ngictau gagac ailu gaginowagac.”

<sup>16</sup> Inguc mibong damong 24 Wapongte emewa ngictaule ngiye-ngiyenginang ngiyecaigaing, yenge ketadi holecnolu haicngineng heluluckelu Wapong afeeibong.

<sup>17</sup> Afeelu yanguc miibong, “Sugucne Wapong Tapilitowa Fileine, nonge kwele-madic edocgugabeleng.

Ga biyachac gaing, ailu ga yakumac gagichac.

---

**11:12:** 2Ngt 2:11    **11:13:** Esek 38:19; Miye 6:12; 16:18; Dan 4:34

**11:14:** Miye 9:12    **11:15:** Wah 15:18; Mige 10:16; Dan 2:44; 7:14



Gageicne tapilitowa balu yakumac ngictau bole balu gagic.

18 Ngic-ngigac himongne himongne gagaing, yenge aalic ngagebong, gale aalict ameinele damengtibac yanguctihac kwesilu gagac.

Gagi ngic-ngigac homaibong yenge wosaeccebalu mimoctocebadamecte.

Ailu kwelec kwekwefocgone yenge gale siduc-mimi ngic, gageicne bingec ngic-ngigacfocgone, sugucne nga kpisicnedi gale wacgone alang bagelecaigaing, yenge aibabanginengte ameine yeledamecte.

Aime ngic-ngigac gocne yengi himongtowale ngic-ngigac nga wiyac sasawa basowalecaigaing, gagi yenge basowalecebadamecte.”

19 Aime honocmengka Wapongte Ibu-mac nuine laliyeibong. Ailu yele dodoficte katapa dongenginengti nganiibong. Nganibong pilatac bame gbululung nga uc sugucnehac holeibong. Aime memeya bame mac hucine sanangkeicne yogo sugucnehac waibong.‡

## 12

### *Ngigac nga hematowa*

<sup>1</sup> Aime maa monic sugucnehac sawawa yanguc fikewec. Ngigac monic ngiyewec, ye wenacti ngakpi ingucne aicnowec. Nga higeinele bagewa

---

**11:18:** Mige 110:5; Rom 2:5; Miye 20:11-13; Mige 115:13 ‡ **11:19:** Himong mogungna mac hucine sawawa mogungkelu posa ingucne sanangkelu wacaigaing. **11:19:** Hib 9:4; Miye 8:5; 15:5; 16:21

tamacne ngiyewec. Aime hodocina asocmeng 12 yengi ngictaule duu ingucne ngiyeibong.

<sup>2</sup> Ye gobeholec, aime kogoc fikenale gado hime aukwewec.

<sup>3</sup> Aime maa monic sawawa fikewec. Hei, hematowa sasacne ingucne monic sugucnebenang ngiyewec. Ye hodocine 7 nga begicine 10. Ailu ye hodocina ngictaule duu 7 holelu ngiyewec.

<sup>4</sup> Ngiyelu ye gicinedi sawawale asocmeng habu sugucne yogowacni habackang heuckelu iwacni nebocine pelengkelu himongka wicebawec. Aime ngigac yogo kogoc banale aime hematowa ye kogoc yogo gbokenale ngagelu ngigac yele haicka domawec.

<sup>5</sup> Domame ngigac ye madec monic bawec. Bame yele gboli yogo biyachenang Wapongta balu feibong. Bafelu yele ngictaule ngiye-ngiyewa lobong fawec. Aime madec yogo, ye himongne himongne ngic-ngigac aen yasudi damongebadaicte.

<sup>6</sup> Aime ngigac ye himong kisiwa misaine mikacka hangoc hikewec. Hikeme yengi ye hadeng 1 taosen 260le kwelina noba-nosing lacnolu ngani-damong aicnodaingte. Wapongti yele mac ngiye-ngiye iwa biyachac bamockewec.

### *Maikel nga hematowa*

<sup>7</sup> Aime honocmengka hudu sugucne fikewec. Iwa yanguc fikewec, Maikel nga angelofocine yenge hematowa yeholec wenagulu hematowa nga angelofocine yenge hudu ameine bafaliyebong.

---

**12:1:** Fike 37:9-11    **12:2:** Mika 4:10    **12:3:** Dan 7:7; Esek 29:3

**12:4:** Dan 8:10    **12:5:** Yes 7:14; 66:7; Mige 2:9; Miye 19:15    **12:7:** Yud 9; Dan 12:1

<sup>8</sup> Ailu tapilingineng mikac aime yengi hatacmac honocmengka gagale sawaine monic mi fawec.\*

<sup>9</sup> Aime hematowa ye hema esecne, yele wac monic Aleng Sugucnengineng nga Satang, ye nga angelofocine wicebabong himongka waibong. Yedi himongtowawa ngic-ngigac sasawa kwesacka mengocebame yenge ye balaibeccaigaing.

<sup>10</sup> Aime yowa-malac sugucne monic honocmengka yanguc mime ngageiba,

“Wasecne ainogale dameng nga tapili ailu nganidamong yogolec fileine Wapong, yogo yakumac noine fikegac.

Aime Kristo bawosaewec, yedi yakumac yogolec bole-yowa tapiliineholec balu gagac.

Ngic hae-gbafocnonggeng yowawa locebacaigac, yedi Wapongnonggengte haicka deboc hadeng yowawa locebalu game ye biyachac honocmengkacni wickebong wawec.

<sup>11</sup> Ngic hae-gbafocnonggeng yenge Lama madecinele sac nga Sugucnele yowa mibong yegengkewecte gbelong ailu Aleng Sugucnengineng huduwa ewaliibong.

Ailu yengileng kwelenginengti gaganginengte ngagebong feicne mi aime homacte mi hangocebawec.

<sup>12</sup> Honocmeng nga aling honocmengka gacaigaing, ngenge wiyac honocmengka fikewecte ailu beliyedaing.

---

\* **12:8:** Dan 2:35    **12:9:** Fike 3:1,14; Luk 10:18; 22:31; Miye 20:2  
**12:10:** Yop 1:11; Sek 3:1

Aimebac, mee, himongka nga kiwecka gagaing,  
 ngenge medecngebadaic.

I yangucte, Aleng Sugucnengineng ye ngengela  
 kwesigac.

Ailu damengngine bangkaleme ngagegacte ailu  
 kwele-dackolec aalickegac.”

<sup>13</sup> Yenge hematowa himongka wickebong wawec,  
 ye yogo ngani-motolu ngigac kogoc gobeelu  
 madec bawec, ye yebiyewec.

<sup>14</sup> Yebiyeme ngigac ye hemale haickacni hangoc  
 hikelu himong kisiwa misaine mikacka hikenale  
 aime, monicti ngigac yogo hikictowa kwegecine  
 lacnome filalangkelu hikewec. Mac yogo yele mac  
 ngiye-ngiye iwa biyachac bamockewec, yogowa  
 hikewec. Ye iwa hifa 3 nga hifa monic nebocine  
 dameng inguc ngiyeme yengi ye ngani-damong  
 aicnolu nosing lacnodaingte.

<sup>15</sup> Lacnobong hemadi ye yebiyelu lumong ingucne  
 banale micinacni misa mengume misa ingucne  
 walu hikewec.

<sup>16</sup> Hikeme himongti ngigac bafickelu micine  
 angkeme, hematowadi misa micinacni mengume  
 wame, himongti misa yogo gbokewec.

<sup>17</sup> Gbokeme hematowa ye ngigac yele aalic  
 ngagewec. Ngagelu hike ngigac yele adu-  
 madecfocine Wapongte ung-yowa balaibelu  
 gacaigaing, ailu Yesu Kristole siduc yogo mibong  
 yegengkeme balaibecaigaing, yenge hudu  
 sugucnedi wecebanale hikewec.

<sup>18</sup> Ailu ye kiwec mecina dingongka domawec.

# 13

## *Hudu-baba-sic monic kiweckacni ofewec*

<sup>1</sup> Aime nganibe kiweckacni hudu-baba-sic monic ofewec. Ye begicine 10 nga hodocine 7, aime begicine yogolec feina ngictaule duu 10 ngiyeibong. Aime hodoc yogo yengele feinginang Wapong fecnogac, yogolec wac haicine monic-monic kwelengkeicne fawec.

<sup>2</sup> Aime sic yogolec socine yogo kate-ngiyaungtowale soc ingucne aiwec. Nga micine yogo laionte mic ingucne. Ailu higeine yogo beya ingucne fingacine dalicne.

Aime hematowa ye bole-yowa tapiliineholec ailu ngictaule ngiye-ngiyeine yogo ngic-ngigac bocyac damongebanale hudu-baba-sic bole-hibi yogo lacnowec.

<sup>3</sup> Aime hudu-baba-sic yogo hodocine monic lo-focineholec nganiiba. Hodocine yogo webong waictowaineholec ailu homaicne ingucne aiwec. Ailubac yogo wisiyewec. Aime himongne himongne ngic-ngigac bocyacti hudu-baba-sic yogo nganilu kwatackelu ye balaibeibong.

<sup>4</sup> Balaibebong hematowa ye hudu-baba-sicti ngic-ngigac damongebanale bole-yowa tapiliineholec lacnowecte ailu hematowa afeebong. Ailu yenge hudu-baba-sic momoc afeelu yanguc mi-ibong, “Madi ye ingucne aidaicte? Ailu madi yeholec hudu nalic wedaicte?”

<sup>5</sup> Tapili lacnome ye kosa aukwelu Wapong misulec aicnowec. Aime tapili yogo lacnome,

---

**13:1:** Miye 12:3; 17:3,7-12  
Miye 17:8

**13:2:** Dan 7:4-6

**13:3:** Fike 3:15;

ye tamacne 42le kwelina Wapong ye ngagecno-  
ngiyeme ngic-ngigac damongebanale bole-yowa  
nga tapili balu gawec.

<sup>6</sup> Ailu ye micine angkelu Wapong misulec aic-  
nolu Wapong wacine nga macine ailu aling hon-  
ocmengka gagaing, yenge misulec aiyelewec.

<sup>7</sup> Inguc aiyeleme Wapongti ngagecno-ngiyeme  
ye Wapongte bingec yengela hudu welu yenge  
huduwa ewalicebalu gbelong aidaicte. Ailu  
ye himong fengnginang fengnginangsoc ngic-  
ngigac, nga soc haicine monic-monic, ailu yowane  
yowane, nga himongne himongne ngic-ngigac,  
yenge damongebanale bole-yowa tapiliineholec  
lacnowec.

<sup>8</sup> Inguc lacnome ngic-ngigac himongka gagaing,  
yengele wacngineng Gagale hibiwa mi fagac,  
yenge sasawa hudu-baba-sic afeedaingte. Gagale  
hibi yogo Lama madecine webong homawec,  
yele hibi. Ailu himong bafuwawec, dameng yo-  
gowa ngic-ngigacfocine wacngineng kwelengke-  
icne fawec.

<sup>9</sup> Monic hedeckolec gagacti yowa yago aneng  
ngagedaic.

<sup>10</sup> Monic balu muc-macka lonogale mibong, ye  
muc-macka hikedaic.

Monic hudu-babale fitecti wehomanogale milu,  
ye webong homadaic.

Ilec Wapongte bingec yenge tatakic mikac  
doickolec wangec galu ngage-ngagesingkolec  
gadabiyeng.

---

**13:5:** Dan 7:8,25; 11:36; Miye 11:2    **13:6:** Dan 8:11    **13:7:** Dan  
7:23; Miye 11:7    **13:8:** Dan 12:1-2; Mige 69:28; Miye 17:8; 20:12,15;  
21:27    **13:10:** Yer 15:2; 43:11; Miye 14:12

*Hudu-baba-sic monic ye himongkacni ofewec*

<sup>11</sup> Inguc aime nganibe hudu-baba-sic monic himongkacni ofewec. Ye begicine yaeckang, yogo lamale ingucne. Ailu hematowale yowa ingucne miwec.

<sup>12</sup> Inguc milu yedi hudu-baba-sic kiweckacni molickelu ofewec, ye bafickenale yele bole-yowa tapiliineholec sasawa balu gawec. Ailu himongka ngic-ngigac gagaing, yenge aieleme hudu-baba-sic kiweckacni ofewec, ye afeeibong. Ye biyac homawec, inguc ngageibong. Aimebac waicine biyachac wisiyewec.

<sup>13</sup> Aime hudu-baba-sic himongkacni ofewec, yedi pasile maaine sugucnehac balu gawec. Monic yanguc fikewec, ngic-ngigac yengele haicka sawawacni dac himongka wawec.

<sup>14</sup> Ailu kiweckacni ofewec, ye bafickelu pasile maaine bawecte ailu ngic-ngigac himongka gagaing, yenge kwesacka mengocebame ye balaibelu gaibong. Ailu ngic-ngigac himongka gagaing, yenge edocebame hudu-baba-sic ye hudu-babale fitecti esecne biyachac webong homaicne ingucne gawec, yele iluc monic balu alang bacnoningte edocebawec.

<sup>15</sup> Babong hudu-baba-sic himongkacni ofewec, yedi hudu-baba-sic kiweckacni yele ilucine yogo asu lacnonale tapili lacnowec. Lacnome iluc yogodi yowa mimi aiwec. Aime ngic-ngigac sasawa yenge iluc yogo mi afeedaingte, yogo yenge wehomacebanale tapili balu gawec.

<sup>16</sup> Balu game hudu-baba-sic himongkacni ofewec, yedi ngic-ngigac sasawa sugucne nga kpisicne, mafaholec nga mafa mikac, kwelec kwekwe ngic sugucnefocngineng yengele bagewa gagaing. Nga ngic-ngigac ngic monicte bagewa mi gagaing, yenge sasawadi maa monic molefolenginang me meinginang balu ganingte yoingebalu yelewec.

<sup>17</sup> Inguc aime ngic monicti hudu-baba-sic kiweckacni ofewec, yele wacine me dzalewa wacine, yogolec maaine mi balu gagacka, ye wiyac monic fuli nalic mi badaicte, me mi saledaicte.

<sup>18</sup> Hudu-baba-sicte dzale yogo ngic monicte dzale, yogo 666. Aime monic ngage-ngageholecti wacinele dzale yogo wafelu maainele fungine ngage-motodaic.

## 14

### *Lama madecine nga ngicfocine 144 taosen*

<sup>1</sup> Hei, na Lama madecine nganibe ye Sion tikiwa ngic 144 taosen yengeholec domawec. Ngic domaibong, yenge Lama madecinele wac nga Mamacinele wac yengele meiwa kwelengkeicnedi domaibong.

<sup>2</sup> Aime honocmengkacni uc monic misa dung sugucne yele uc ingucne aiwec. Yogo gbululung sugucnehac holecaigacte uc ingucne ngageiba. Ailu yogo gita wewe ngic yengi gita mucngineng homacne webong ucine fikecaigac, yogo ingucne ngageiba.



<sup>3</sup> Aime ngictaule ngiye-ngiyewa nga wiyac gaganginengkolec <sup>4</sup> ailu damong yengele haicka domalu gee gbolicne monic holeibong. Holeibong ngic 144 taosen himongkacni biyachac fuli bacebaicne, yenge sugudi gee yogo nalic ngagelu holedaingte.

<sup>4</sup> Ngic yogo yenge ngigac yengeholec monic mi faicne. Ailu wonongngineng mikac gbag-bacnebenang gaibong. Yenge Lama madecinedi mac wenuwa hikecaigac, iwa ye balaibecaigaing. Lama madecinedi himongte ngic-ngigac yengele hewackacni fuli bacebame yenge Wapong nga yeicne molic-molic alingfocine aibong.

<sup>5</sup> Ailu yenge micnginengti yowa kwesacine monic mi miibong, yenge gbagbacne nga sowac-nengineng mikac gaibong.

### *Angelo habackang*

<sup>6</sup> Na angelo monic nganiiba, ye sawa hewacka falockelu hikewec. Hikelu Siduc Madicne fafeginowagac, yogo ngic-ngigac himongka gagaing, yenge milu edocebame yegengkenale balu gagac. Bagalu himongne himongne ngic-ngigac, nga himong fengnginang fengnginangsoc ngic-ngigac, ailu yowane yowane, nga soc haicine monic-monic, yengela

<sup>7</sup> yowa sugucnehac wackelu edocebalu yanguc miwec, “Ngenge Wapongte hangocgebame alang bacnolu wacine bafedabiyeng. Wapong ye ngengele aibaba wosaelu mimoctodaicte, yogolec dameng biyac bangkale welegacte ngenge sawa

nga himong ailu kiwec nga misa dongeine bafuwacebawec, ye afeedaing.”

<sup>8</sup> Inguc mime angelo 2 yedi ye balaibe welelu yanguc miwec, “Babilon taontowa\* ye waweicne hocne, Babilon yogo biyac waweicne fagac. Yedi hocne selo-boic aibabaine angacineholec, yogo waing misa ingucne himongne himongne ngic-ngigac sasawa gumecebame nowackeibong.”

<sup>9</sup> Inguc mime angelo 3 yedi yeke balaibecepalu kwesilu yowa-malac sugucnehac yanguc miwec, “Monic ye hudu-baba-sic nga ilucine afeecaigac, ailu yele maa yeicne meiwa me moleina balu gagacka,

<sup>10</sup> ye yeicne Wapongte kwele-dacte waing misa nodaicte. Waing yogo sanangnebenang misaholec mi lalickeicne, ye aalictc kwenocce kap iwa sotingkeme hauicne ngiyegac. Aime Wapong yeicne angelofocine ailu Lama madecine, yengele haicka dac nga salfa-posa ubilangineholec yogolec kwelina doictowa ngagedaicte.

<sup>11</sup> Aime ngic-ngigac hudu-baba-sic nga ilucine ketadi holecnolu afeelu gaibong. Ailu yele wacte maa baibong. Ngic-ngigac yogo yenge dacka doictowa ngagebong yogolec hasocce damengsoc moto-motoine mikac ofelu hasocebalu game yenge deboc hadeng kwele-mogung monic mi bafuwadaingte.”

---

\* **14:8:** Taon yogolec ngic-ngigac yenge habu moniyang gaibongte ailu ngigac monic ingucne “ye” kwelengkwec. **14:8:** Yes 21:9; Dan 4:30; Yer 51:7,8; Miye 17:2; 18:2,3 **14:9:** Miye 13:12-17 **14:10:** Fike 19:24; Mige 75:8; Yes 51:17,22; Yer 25:15-16; Esek 38:22; Miye 16:19; 20:10; 21:8 **14:11:** Yes 34:10

12 Inguc aime Wapongte bingec yenge Wapongte ung-yowa balaibelu Yesu ngagesingkelu gagaing, yenge tatakic mikac sanangne gadabiyeng.

13 Aime honocmengkacni yowa-malac monic yanguc fikelu edocnuwec, “Ga hibiwa yanguc kwelengkec, ‘Yakumachac molickelu ngic-ngigac Sugucneholec wetackelu homagaing, yenge kwele-angackolec.’ ”

Inguc mime Asudi yanguc miwec, “Oc, aiba-bangineng madicne ngagesilu bacebame yenge doic-bolewacni ngiye-ngagedaingte.”

*Himongtowawa noine babale dameng*

14 Hei, na kaguwa monic kwalac-kwalac nganiiba. Nganibe yogolec feina ngic monic silicine ngicte madec ingucne ngiyewec. Ye hodocina ngictaule duu monic goldi baicne holelu moleina noine-wewele fitec monic micineholec balu ngiyewec.

15 Balu ngiyeme angelo monicti Ibu-mackacni walu ngic kaguwa feina ngiyewec, ye sugucnehac wackelu yanguc edowec, “Himongte nosing noine houweme wewele dameng biyac kwesigacte ailu, ga noine-wewele fitecgonedi balu noine welu banong.”

16 Inguc mime ngic kaguwa feina ngiyewec, yedi noine-wewele fitecinedi himongka ngosockelu himongte nosing noine welu bawec.

17 Weme angelo monic honocmengte Ibu-mackacni wawec, ye inguchac noine-wewele fitec monic micineholec balu ngiyewec.

18 Aime angelo monic ye dac damongkenale bole-yowa nga tapili balu gawec, yedi alatawacni kwesiwec. Kwesilu yowa-malac sugucnehac wackelu angelo monic noine-wewele fitec micineholec balu ngiyewec, ye yanguc edowec, “Himongka waing noine biyac houweyackegac. Ilec ga noine-wewele fitecgone micineholecti waing noine welockelu kpaduckeyackec.”

19 Wackeme angelo yogodi noine-wewele fitecinedi himongka ngosockelu himongte waing noine helockelu kpaducebalu Wapongte kweledacte waing hesoc-hesocte posatowa sugucna wicebame faibong.

20 Fabong waing hesoc-hesocte posatowa taon lobina domawecti hesocebawec. Aime waing hesoc-hesocte posatowa iwacni sac walu sugulelu fangkewec, yogo becosic yengele ube oiyalu fame himong 300 kilomita lesoc hikelu wakewec.†

## 15

### *Angelo 7 peholec*

1 Na honocmengka maa monic feicne damuineholec fikeme nganiiba. Nganibe angelo 7 yenge doic 7 moto-motoine balu domaibong. Doic 7 yogo fikeemewa Wapongte kwele-dac motoyackedaicte.

2 Na wiyac monic kiwec ingucne galasdi baicne dackolec lalickeicne ingucne nganiiba. Nganibe ngic-ngigac yenge hudu-baba-sic nga ilucine ailu

---

**14:18:** Yol 3:13 † **14:20:** 300 kilomita yogo Finschhafenkocni hikegacgu Goroka, dalicne yogolecsoc. Ye stadia 1 taosen 600 kwelengkewec. Stadia moniyang yogo 185 mita ingucne aigac.

**14:20:** Yes 63:2-3; Miye 19:15

dzalewa wacine alang mi bacnolu huduwa ewal-icebalu gbelong aibong, yenge nganicebaiba. Yenge Wapongti gita mucine homacne biyachac yelewec, yogo kiwec feina balu domaibong.

<sup>3</sup> Ailu yenge Wapongte kwelec kwekwe ngic Moses nga Lama madecine, yekele gee yanguc milu holeibong,

“Sugucne Wapong Tapilitowa Fileine, aibabagone yogo feicne nga damuineholec.

Ailu ga himongne himongne yengele ngictau. Gale yefe yogo dondonne nga noine.

<sup>4</sup> Sugucne ga sugu gbagbacne. Ilec ailu madi mi hangockeme wacgone mi bafedaicte?

Ailu gale pasi dondonne yogo yegena fikewecte ailu, himongne himongne ngic-ngigac sawa yenge kwesilu gale haicka ketadi holelu afegudaingte.”

<sup>5</sup> Inguc holebong motome nganibe honocmengka Wapongte Ibu-macka dodofic katapale kpoluc-fale yogolec nuine laliyeibong.

<sup>6</sup> Laliyebong angelo 7 yenge doic 7 balu domai-bong, yenge ngakpi-kpoluc kwalacne kpoluc madicnebenang yogo angocineholec holelu umbika goldi baicne yogodi mondacngineng hefelu Ibu-mackacni waibong.

<sup>7</sup> Wabong wiyac gaganginengkolec 4 yengelacni monicti angelo 7 yenge pele 7 yelewec. Pele yogo goldi baicne ailu Wapong gagac nga gaginowagac, yele kwele-dacti iwa wakeicne fawec.

<sup>8</sup> Fame Wapongte hibi-angoc nga tapili, yogolec hasocti Ibu-mac kweline wakewec. Dameng iwa monicti Ibu-mac yogolec kwelina nalic mi fedaicte. Aime angelo 7 yengele doic 7 yogo sasawa motoyackeme Ibu-macka hatacmac fedaingte.

## 16

### *Wapong kwele-dacinele pele*

<sup>1</sup> Na Ibu-mackacni yowa-malac monic sugucne-hac ngagebe yedi angelo 7 yanguc edocebawec, “Ngenge hikelu Wapongte kwele-dacti pele 7 wakeicne yogo himongka sotingkebong hauna.”

<sup>2</sup> Inguc mime angelo molic-molic yedi hikelu pele yogo sotingkeme himongka hauwec. Haume ngic-ngigac hudu-baba-sicte maaine balu gaibong, nga ilucine afeelu gaibong, yenge waic-sanang sowacne doicineholecti fikeyelewec.

<sup>3</sup> Aime angelo 2 yedi pele sotingkeme kiwecka hauwec. Haume kiwec hefaliyelu ngic homaicinele sac ingucne aiwec. Aime wiyac sasawa gaganginengkolec kiwecka gaibong, yogo homay-ackeibong.

<sup>4</sup> Homabong angelo 3 yedi pele sotingkeme misa sugucna nga misa dongeina haume misa yogo sasawadi sac aiyaackeibong.

<sup>5</sup> Aime angelo 3 ye misa fileine aigac, yedi ngagebe yanguc miwec,

---

**15:8:** Esek 10:2-4; 1Ngt 8:10-11; 2Ngsi 5:13-14; Yes 6:4      **16:1:**  
 Yes 66:6; Yer 10:25; Esek 14:19      **16:2:** Wah 9:10; Miye 13:12-17  
**16:3:** Wah 7:17-21

“Sugucne gbagbacne fileine, ga biyachac gaing ailu yakumac gagic.

Ga pasigone yogo dondonne.

Ailu wiyac sasawa yago yowawa locebaing.

<sup>6</sup> I yangucte, wiyac yogo yengi geicne bingec ngic-ngigacfogone nga siduc-mimi ngic wecebabong yengele sac sotingkelu wawec.

Ilec ailu gagi sac misawacni noningte gumecebaengka nobong amengineng yogo dondonne aigac.”

<sup>7</sup> Inguc mime ngagebe alatadi yanguc miwec,

“Oc, Sugucne Wapong Tapilitowa Fileine, ga ngic-ngigac wosaecebalu yefe dondonna nga noina balaibelu aibabangineng mimocto-caigic.”

<sup>8</sup> Aime angelo 4 yedi pele sotingkeme wenacte feiwa haume wenac ye dacineholec ailu ngic-ngigac lobecebanale tapili bawec.

<sup>9</sup> Balu dacine sugucnehacbenang ailu lobece-bawec. Aime sifu ngic-ngigac yenge kwelenging mi hefaliyeibong. Yenge doic 7 yogolec fileine Wapong, yele wac feicne mi bafelu misulec aicnoibong.

<sup>10</sup> Aime angelo 5 yedi pele sotingkeme hudubaba-sicte mac ngictaule ngiye-ngiyewa haume yele ngani-damong yogo kundung kwewec. Ailu ngic-ngigac yenge doic sugucnehac ngageibongte ailu mamang hiduibong.

---

**16:6:** Yes 49:26; Mige 79:3      **16:7:** Yef 32:4; Mige 19:9; Miye 15:3

**16:9:** Miye 9:20-21      **16:10:** Wah 10:22; Yes 8:21-22; Mige 79:5,10

<sup>11</sup> Ailu yenge doic nga waic socnginang fikewec. Yogolec ailu honocmengte Wapong misulec aic-noibong. Ailu aibabangineng yogolec kwelengineng mi hefaliyeibong.

<sup>12</sup> Aime angelo 6 yedi pele sotingkeme Yufretis misa sugucna hauwec. Haume ngictau wenac ofe-ofeinacni yengele yefe fikenale misa yogo dikewec.

<sup>13</sup> Dikeme nganibe hematowa nga hudu-baba-sic ailu siduc-mimi ngic kwesacine,\* yengele mickacni asu habackang silicngineng wabolac ingucne wonongnginengkolecti ofelu waibong.

<sup>14</sup> Asu yogo yenge aleng sowacnebenang. Ailu pasile maaine bacaigaing. Wapong Tapilitowa Fileine, yedi ngic-ngigac wosaecebanale bole badaicte. Dameng yogolec ailu aleng yenge himong sasawale ngictau yengela hikelu Wapongkolec hudu weningte kpaducebaibong.

<sup>15</sup> Aime monicti miwec,

“Ngagegaing, na hise-baba ngic ingucne kwesidacte. Kwesibe monic ye deboc-gboli galu ngakpi-kpolucine damongkelu game ngic-ngigac yengi senggangngine mi nganidaingte. Aime mi gameedaicte, ngic ingucne ye kwele-angackolec.”

---

**16:12:** Fike 15:18; Yes 11:15      \* **16:13:** Hudu-baba-sic himongkacni ofewec, yele siduc yogo Miyegengkeicne 13:11-15 iwa fagac. Yedi hocne siduc-mimi ngic kwesacine aigac. Miyegengkeicne 19:20 iwa yegena aidaicte. Ye hudu-baba-sic molickelu kiweckacni ofewec, ye bafickecaigac.      **16:13:** Wah 8:3-7; Sek 12:3-4  
**16:14:** Miye 19:19      **16:15:** Mat 24:43-44; Miye 3:3



16 Aime aleng yengi himong monic Hibru yowawa wacine Amagedon, iwa ngictau kpaducebaibong.

17 Kpaducebabong angelo 7 yedi pele sotingkeme sawawa haume Ibu-mackacni yowamalac sugucnehac ngictaule ngiye-ngiyewacni welelu miwec, “Wapongte kwele-dac biyac miyac aigac.”

18 Inguc mime pilatac bame gbululung holeme uc fikewec, aime memeya sugucnehac bawec. Aime ngic-ngigac himongka esecne gaibong, dameng iwa memeya sugucnehac nga feicnebenang ingucne monic mi bawec.

19 Memeya balu Babilon taon sugucne bauckeme habackang aiwec. Ailu himongne himongne ngic-ngigac yengele taon bocyac sowaleibong. Sowalebong Wapongti Babilon taonte ngic-ngigac yengele ngagesilu kwenocce kap iwa kwele-dacte waing aalicineholec yogo yelewec.

20 Aime nuc sasawa yenge hikelu sangkeyackeibong. Aime ngic-ngigac yenge tiki basackelu monic mi nganiibong.

21 Aime sawawacni mac hucine sanangkeicnedi walu ngic-ngigac feinginang holeme yenge doic sugucnehac ngageibong. Mac hucine moniyang moniyangte umacine yogo 40 kilo-lesoc aiwec. Aime ngic-ngigac yenge doic sugucnebenang ngagelu Wapong misulec aicnoibong.

---

**16:16:** Sek 12:11    **16:18:** Wah 19:16-18; Dan 12:1-2; Miye 4:5; 8:5

**16:19:** Miye 14:10    **16:20:** Miye 6:14    **16:21:** Wah 9:23-24; Esek 38:19-22; Miye 11:19

# 17

## *Yefe-ngigacti ameine bawec*

<sup>1</sup>Angelo 7 yenge pele 7 balu gaibong, yengelacni monicti nala kwesilu naholec yowa mingagec ailu yanguc miwec, “Yefe-ngigac sugucne ye misa bocyac yengele feinginang ngiyegac, Wapongti aibabainele ameine lacnodaicte. Ga weleng yogo edaligudacte.

<sup>2</sup>Himongte ngictau yenge yeholec selo-boic aibaba aibong. Aime yele selo-boic aibabale waing misadi ngic-ngigac himongka gagaing, yengele kwele nga ngage-ngage bame sifuweicne.”

<sup>3</sup>Aime angelodi Asule tapiliwa bacnume himong kisiwa misaine mikacka hikeiba. Hikelu nganibe ngigac ye hudu-baba-sic monic sasacne, yele feiwa ngiyewec. Aime hudu-baba-sic ye hodocine 7 nga begicine 10. Ailu ye socine sasawa yogo Wapong fecnogac, wac ingucnedi wakeyackeicne.

<sup>4</sup>Ngigac yogo ye ngakpi-kpolucine mondo-sasac nga giweng, ailu gol nga posa basufaleicne, ailu kwanang fuline sugucnehac latic-laticine holelu ngiyewec. Ailu ye kwenocne kap monic goldi baicne, iwa selo-boic aibabaine wonongkolec nga wiyac sowacnebenang memenguinedi wakeyackeicne yogo moleina balu ngiyewec.

<sup>5</sup>Ailu yele meiwa wac monic sangkeicne yogo kwelengkeicne fawec. Wac yogo yanguc, Babilon taon sugucne yogo wiyac sowacnebenang

memenguinedi fikelu himongte yefe-ngigac yengele nenggacngineng aigac.

<sup>6</sup> Aime ngigac nganiiba, yedi Wapongte bingec yenge Yesule yowa-siduc mibong yegengkewec, yenge wehomacebaibong, yengele sac nolu kweleine sifuwewec. Aime na ye nganilu kwatatacke-benangkeiba.

<sup>7</sup> Kwatackebe angelodi yanguc edocnuwec, “Ga omale kwatackegic? Na ngigac nga hudu-baba-sic hodocine 7 ailu begicine 10 yedi ngigac yogo atickelu gacaigac, yekele ngage-ngage sangkeicnele fungine yogo edocgudacte.

<sup>8</sup> Ga hudu-baba-sic nganigic ye biyachac gawec nga yakumac mi gagac. Ye long sugucnebenang iwacni ofedaicte. Ailu ye sowalenale hikedaicte. Aime ngic-ngigac himongka gagaing, yengele wacngineng Gagale hibiwa mi kwelengkeicne fawec, yogo Wapongti himong bafuwawec, iwacni fike-ofewec. Yenge hudu-baba-sic esecne biyachac gawec, nga yakumac mi gagac, ailu kwesilu gadaicte, aimebac yenge nganilu kwatackedaingte.

<sup>9</sup> “Ngage-ngage-motoc nga ngage-ngage ileckeicne yanguc balu ganoga. Hodoc 7 yogo tiki 7 aigac. Aime ngigac yedi tiki yogo yengele feingnang ngiyegac.

<sup>10</sup> Aime hodoc yogo yenge inguchac ngictau 7. Yengelacni 5 yenge biyachac waweibong. Aime moniyangtibac ngiyegac. Nga monic yebac

mi kwesigachac. Ye kwesilubac dameng kpisic-nemac ngiyedaicte.

<sup>11</sup> Hudu-baba-sic biyachac gawec nga yakumac mi gagac, ye inguchac ngictau yogo yengela taock-eme dzalengineng 8 aigaing. Ailu agongineng monic ye hocne 7 yengela taockelu sowalenale hikedaicte.

<sup>12</sup> “Begicine 10 nganigic, yogo ngictau 10 himongte ngani-damongngineng mi baibonghac, yengebac dameng moniyangtesoc inguc hudu-baba-sickolec ngictau bole banogale bole-yowa tapiliineholec badaingte.

<sup>13</sup> Yenge ngage-ngage moniyang sugu bagalu bole-yowa tapilinginengkolec yogo hudu-baba-sic lacnobong yedi tapili yogo balu gadaicte.

<sup>14</sup> Aime yenge Lama madecineholec wenagulu yedi huduwa ewalicebalu gbelong aidaicte. I yangucte, Lama madecine ye sugucne yengele Sugucne, nga ngictau yengele Ngictau. Aime ngic-ngigac biyachac bawosaecebalu wacebawec, yenge Lama madecinele yowa balaibecaigaing, yenge yeholec gadaingte.”

<sup>15</sup> Aime angelodi yanguc edocnuwec, “Ngic-ngigac soc haicine monic-monic, nga habutowa, ailu himongne himongne ngic-ngigac, nga yowane yowane ngic-ngigac, yenge misa bocyac ingucne. Yogo nganime yefe-ngigacti yengele feinginang ngiyewec.

<sup>16</sup> Ga hudu-baba-sicte begic 10 nganiing, yogo yenge hudu-baba-sickolec wetackelu yefe-ngigac lobe holecnolu wiyacine badaingte. Aime ye

mocbenang senggang ngiyedaicte. Ngiyeme yenge ngigac yele biuc nolu yeicne wickebong dacti lobedaicte.

<sup>17</sup> Wapongti kwelenginang ngage-ngage yogo yelewecte, yenge ngage-ngage moniyang ailu ngictau bolele tapilingineng yogo hudu-babasic lacnodaingte. Lacnolu yenge hudu-babasicte yowa balaibe galu Wapongti yowa biyachac ngageme faweckasoc balaibelu bole aling sasawa bagacgubong Wapongte ngage-ngage fawec, yogo motodaicte.

<sup>18</sup> Aime ngigac nganiing yogo, ye taontowa sugucnele soc holeibong. Taon yogo himongte ngictau yengele damong ailu ye ngictau bolele tapili balu gagac.”

## 18

### *Babilon sugucne*

<sup>1</sup> Yogolec lobeina nganibe angelo monic bole-yowa tapilitowaineholec balu ngiyewec, ye honocmengkacni wame yele hibi-angocti himong bame angolewec.

<sup>2</sup> Angoleme yowa-malactowaine tapiliineholecti yanguc wackewec,  
 “Babilon\* taontowa ye waweicne hocne, Babilon yogo biyac waweicne fagac.  
 Waweme aleng yengele mac-himong nga aleng wonongnginengkolec sasawa ailu nango sic sasawa sowacnebenang

---

**17:16:** Esek 23:25-29; Miye 18:8      **18:1:** Esek 43:2      \* **18:2:** Fengngine iwa Babilonte siduc fagac. Ilec taon yogolec ngic-ngigac yenge habu moniyang gaibongte ailu ngigac ingucne “ye” nga “ga” kwelengkewec.

wonongnginengkolec, yengele mac-himong aiwec fagac.

<sup>3</sup> Yele selo-boic aibabaine yogo angacineholec waing misa ingucne himongne himongne ngic-ngigac sasawa yengi noibong.

Himongte ngictau yenge yeholec selo-boic aibaba aibong.

Ailu Babilon yele tapili nga mafatowainele angacte ailu himongte ngic-ngigac yenge woc-wiyac salecaigaing, yenge mafatowangi-nengkolec aibong.”

<sup>4</sup> Aime ngagebe honocmengkacni yowa-malac monic yanguc miwec,

“Ngic-ngigacfocne, nenge yeholec bikickolec mi ainingte, nga bikicte ameinele doic yeholec mi ngageningte nenge ye hegilelu hiken-ing.

<sup>5</sup> Ye bikic yogo balu kpaduckelu hole feme honocmengka fegac. Aime Wapong ye aibaba sowacne yogo ngagesilu gagac.

<sup>6</sup> Aime yedi aibabaine sowacne ainglewec, yogolec ameine inguchac bafaliyecnolu aibabaine ainglewec ingucnehac feicnehac ailu lacnodaing.

Aime ye pele kwelina misa kweme haume lalickelu yelewec, iwa oma wiyacti ngiyewec, yogo ngagelu ngengi feicnehac lalickecnolu lacnodaing.

---

**18:2:** Miye 14:8; Yes 13:21; 21:9; 34:10-14; Yer 50:39; 51:9    **18:4:**  
 Yes 48:20; Yer 50:8; 51:6,45; 2Kor 6:17    **18:5:** Fike 11:5-9; 18:20-21;  
 Yer 51:9    **18:6:** Mige 137:8; Yer 50:15,29; 2Tim 1:6

7 Inguc aime ye yeicne socine bafelu mafa nga gaga angacineholec balu gawec, yogolec silicina doic nga kwele-sowac lacnodaing.

I yangucte, ye kweleina yanguc ngagecaigac, 'Na hosec miyac, na ngigac-tau.

Ilec kwele-sowac nalic mi ngagedacte.'

8 Ilec ailu hadeng moniyangte kwelina homac nga kwele-sowac ailu nosingte lolocti molickec-nome yele feiwa doic ingucne fikeme ngigac ye dacti lobedaicte.

I yangucte, Sugucne Wapong ye tapiliineholecti, yele pasi wosaclu sowacnele ameine mi-moctodaicte."

9 "Aime himongte ngictau yenge ngigac yeholec selo-boic aibaba aiibong. Ailu mafa nga gaga angacineholec balu gaibong. Ngictau yogo yenge dac yogolec hasocine nganilu yele hisonggong nga kwele-sowac ngagedaingte.

10 Yenge yele doicte hangocebame dalickabenang domalu yanguc midaingte,

'Ga dameng bangkacnele kwelina molickelu yowawa loguwecte ameine biyac welegac.

Ilec ailu, Babilon, ga taon sugucne nga tapiligoneholec, gale kwele-sowac sugucnehac aigel-egabeleng.'

11 Aime himongte ngic-ngigac yenge woc-wiyac salecaigaing, yogo monicti mafangineng hatac-mac fuli mi badaicte. Ilec yele ailu hisonggong nga kwele-sowac ngagedaingte.

12 Mafa gocne, yogo gol nga siliwa ailu posa basufaleicne, ailu kwanang fuline sugucnehac.

Ailu kpoluc hodocineholec madicnebenang hibine mondo-sasac nga giweng, ailu siliga ingucne madicne. Aime yoc sasawa hoine madicne ailu wiyac sasawa elefante begicti baicne, ailu wiyac haicine monic-monic yoc sanangne fuline sugucnehacti baicne. Ailu kopadi nga aenti baicne, ailu posa basufaleicne ailu hibine madicne wiyac sasawa yogodi baicne.

<sup>13</sup> Yogo wiyac monic mosoi yoc ingucne nga gime-aniyang wiyac ingucne ailu wiyac hasoc hoine madicneholec nga tokic hoine madicne. Nga yoc misainedi baicne yogo hasoc hoine madicne, ailu waing misa nga oliwa helocine, ailu flawa madicne nga wit hucine.† Bulumaka nga lama ailu becosic nga keleta. Aime ngic-ngigac bacebabong kwelec kwekwe gaibong, yenge yogo mafa ingucne salecebanogale bacebaibong.

<sup>14</sup> “Ilec ailu ngic-ngigac woc-wiyac salecaigaing, yenge yanguc midaingte, ‘Gale soc-kwelegonedi wiyac noinele aicnolu gawec, yogo hegilecguwec. Aime wiyac sasawa madicne hibi-angocineholec, yogo galacni biyac hikeyackewec. Aime wiyac ingucnehac hatacmac mi bafuwadamecte.’

<sup>15</sup> “Inguc aime ngic-ngigac yenge woc-wiyac salecaigaing, yenge yefe-ngigacti baficebalu wiyac sasawa yago yelacni fuli balu mafatowanginengkolec aiibong. Yenge yele doicte hangocebame dalickabenang domalu hisonggong nga kwele-sowac ngagedaingte.

---

**18:12:** Esek 27:12,13,22 † **18:13:** Mosoi yoc ingucne yogo wacine sinamon, yogo nosing gocna lobong angacineholec aidacte. Tokic wacine yogo mira, nga yoc misaine wacine yogo frangkinsens.

**18:15:** Esek 27:31,36



<sup>16</sup> Ailu yanguc midaingte,  
‘Taontowa, gale kwele-sowac sugucnehac aigele-  
gabeleng.

Ga ngakpi-kpoluc madicnebenang mondo-sasac  
nga giweng, ailu gol nga posa basufale-  
icne fuline sugucnehac, ailu kwanang fu-  
line sugucnehac, yogodi loicne inguc fawec.

<sup>17</sup> Yogo dameng bangkacnele kwelina mafatowa  
sasawa dacti lobeyackeme miyac aiyack-  
ewec.’

Ailu wage bacaigaing damong sasawa nga yen-  
gele bagewa galu wagewa bole bacaigaing, ailu  
kiwecka hike-kwesic aicaigaing. Ailu ngic-ngigac  
sasawa kiwecka sic bacaigaing, yenge sasawa dal-  
icka domadaingte.

<sup>18</sup> Domabong ye dacti lobeme hasocine nganilu  
yanguc milu wackedaingte, ‘Taon esecne nga  
yakumac fagac, taontowa ingucne monic mi fa-  
gac, yogo miyac.’

<sup>19</sup> Yenge hodocnginang lube wickelu hisonggong  
ailu wackelu kwele-sowac ngagelu yanguc  
midaingte,

‘Ye dameng bangkacnele kwelina dacti lobeyack-  
eme miyac aiwec.

Ilec taontowa, gale kwele-sowac sugucnehac  
aigelegabeleng. Aime ngic-ngigac sasawa  
wagenginengkolec kiwecka hikecaigaing,  
yenge yelacni mafatowanginengkolec  
aibong.’

<sup>20</sup> Wapongti ngengele ameine yele feiwa lowecte  
ailu, honocmengka gagaing, nga Wapongte bingec

ailu salecebaicne nga Wapongte siduc-mimi ngic, ngenge yeke amenele ailu beliyedaing.”

<sup>21</sup> Aime angelo tapiliineholec monic, yedi balinga sugucne monic balu wickeme kiwecka haume yanguc miwec,

“Yenge Babilon taontowa dacineholec inguc wickebong haume hatacmac nalic mi bafuwadaingte.

<sup>22</sup> Wickebong gita mucine homacne wewe, nga gee hole-hole ailu muluc fito-fito, nga kpeng fito-fito, yogo yenge gale kweliwa hatacmac nalic mi ngagedaingte.

Ailu mole-hibi haicine monic-monic yogolec bole-ngic, yenge gale kweliwa hatacmac nalic mi gadaingte.

Aime posadi flawa wesockecaigaing, yogolec ucine gale kweliwa hatacmac nalic mi ngagedaingte.

<sup>23</sup> Gale kweliwa hifa angocine hatacmac nalic mi kweme angoledaicte.

Aime ngic-ngigac banagunogale aiboc, yekele kwele-madicte aukwecaigaing, ucine ingucne gale kweliwa hatacmac nalic mi ngagedaingte.

Iyangucte, gale ngic-ngigac yenge woc-wiyac salecaigaing, yenge himongte ngic-ngigac sugucne gaibong.

Nga ga mosoc aibabagone sowacnedi himongne himongne yogolec ngic-ngigac sasawa kwele basifuc aiyeleing.

---

**18:20:** Yes 44:23; Yef 32:43; Yer 51:48  
**18:21:** Yer 51:63-64; Esek 26:21  
**18:22:** Yes 24:8; Esek 26:13  
**18:23:** Yer 7:34; 16:9; 25:10; Yes 23:8-9

24 Ailu taontowa yogolec kwelina Wapongte siduc-mimi ngic nga Wapongte bingec ailu ngic-ngigac sasawa himongka wecebabong homaibong, yengele sacngineng bafuwaibong.”

## 19

### *Haleluya, Wapong mitengkegabieng*

<sup>1</sup> Yogolec lobeina honocmengka aling suguc-nebenangti yowa-malac ingucne ngagebe yanguc miibong,

“Haleluya,\* bikicte ameine bame wasecne aigabeleng.

Ilec bole nga wac feicne ailu tapili, yogodi Wapongnonggente aigac.

<sup>2</sup> Iyangucte, ye ngic-ngigac yowangineng wosaelu yefe dondongna nga noina balaibelu aibabangineng mimoctocaigac.

Ailu ye yefe-ngigac sugucne selo-boic aibabainedi himongtowa basowalewec, yele aibaba wosaelu Wapongte kwelec kwekwefocine wehomacebaibongte ailu yengele sacnginengte ameine ye lacnowec.”

<sup>3</sup> Ailu yenge hatacmac yanguc miibong,

“Haleluya, yefe-ngigacte hasoc yogo motomotoine mikac fafejinowagac.”

---

**18:24:** Yer 51:49; Miye 17:6      \* **19:1:** “Haleluya” yogo Hibru yowa. Yogolec fungine yanguc, Wapong mitengkegabeleng.

**19:1:** Mige 104:35      **19:2:** Mige 19:9; 2Ngt 9:7; Yef 32:43; Miye 6:10      **19:3:** Yes 34:9-10

4 Inguc mibong damong 24 nga wiyac gagangi-nengkolec 4, yenge ketadi holecnolu Wapong ngictaule ngiye-ngiyewa ngiyegac, ye afeelu yanguc miibong,

“Yogo foinac, haleluya.”

5 Inguc mibong yowa-malac monic ngictaule ngiye-ngiyewacni yanguc miwec,

“Wapong kwelec kwekwefocine, wac feicneholec nga waweweine gagaing, nenge alang bac-nocaigaing, nenge Wapong mitengkening.”

*Lama madecinele baba-tumang*

6 Inguc mime yowa-malac monic ngageiba, yogo ngic-ngigac aling sugucnehac yengele yowamalac ingucne aiwec. Yogo misa dundung sugucne yele ucine, nga gbululung sugucnele ucine ingucnedi yanguc miibong,

“Haleluya, Sugucne Wapongnonggeng Tapilitowa Fileinedi ngictau ailu damongnubagac.

7 Lama madecinele baba-tumang dameng kwesime ngigacinedi† biyac efeckegacte ailu, yele kwele-madic ngagelu beliyelu Lama madecinele wac bafedabeleng.

8 Inguc ailu ngigacine ngakpi-kpolucine madicnebenang gbagbacne nga hibi-angocineholec holenale Wapongti lacnowec.”

Ngakpi-kpolucine madicnebenang yogo Wapongte bingec yengele aibaba dondonne.

---

**19:4:** Mige 106:48      **19:6:** Mige 95:10; Yes 52:7; Miye 14:2

† **19:7:** “Ngigac” yogo Yesule habu yengele milu kwelengkewec. Monic 2 Korin 11:2 yogowa kwelengkeicne.      **19:7:** Yes 61:10; Miye 21:2

<sup>9</sup> Inguc mime angelodi yanguc edocnuwec, “Ga hibiwa yanguc kwelengkec, Lama madecinele baba-tumangte fatawa wacebaicne, yenge kwele-angackolec.” Inguc milu yanguc miwec, “Yowa yago Wapongte yowa noine.”

<sup>10</sup> Inguc mime na angelo yele higewa ketadi holecnolu afeenogale aiiba. Aime yedi yanguc edocnuwec, “Inguc mi ainong! Na ga nga ngic hae-gbafocgone Yesule yowa yogo mibong yegengkeme balu gagaing, ngengele kwelec kwekwe ngic agongineng. Siduc-mimi yengele yowale kwele-ngage-ngage yogo Yesule yowa miyegengkeicne hocne. Ilec ailu ga Wapong afeenong.”

### *Becosic lalacne*

<sup>11</sup> Inguc mime honocmeng angkeme nganiiba. Hei, na nganibe ngic monic becosic monic lalacnele feiwa ngiyewec. Aime ngic ngiyewec, yele wacine yanguc, Yowaine Balaibecaigac, ailu Yowa Noine micaigac. Ailu ye pasi dondonne yogowa ngic-ngigac yowawa locebalu huduwa weceba-caigac.

<sup>12</sup> Ye dongeine yogo dac-ubilang ingucne, nga hodocina ngictaule duu bocyac holewec. Ailu socina wacine monic kwelengkeicne, yogo monicti nalic mi ngagedaicte, yeuc sugu ngegegac.

<sup>13</sup> Ailu ye ngakpi dalicne monic sacka kpomuluckeicne holewec. Ngic yele wacine yogo Wapongte Yowa.

---

**19:9:** Mat 22:2-3    **19:10:** Sale 10:25,26; Miye 22:8-9    **19:11:** Miye 1:5; 6:2; Mige 96:13; Yes 11:4    **19:12:** Dan 10:6; Miye 1:14; 2:17    **19:13:** Yes 63:1-3; Yoa 1:1,14

<sup>14</sup> Aime honocmengte hudu-baba ngic aling yenge ye balaibeibong, yengele becosicngineng yogo lalacne. Ailu ngakpingineng ngani-nganiine madicnebenangti lalacne nga gbagbacne.

<sup>15</sup> Aime micinacni hudu-baba fitec monic micineholec ofelu wawec, ye yogodi himongne himongne ngic-ngigac wecebadaicte. Ailu ye ngictaule aen yasudi ngic-ngigac sanangne damongebadaicte. Ailu Wapong Tapilitowa Fileine yele kwele-dac aalicineholec, yogo waing noine hesoc-hesocte aibaba ingucne. Aime ngic yogo yedi waing noine hesocebadaicte.

<sup>16</sup> Kpolucina nga ponggaina wac monic yanguc kwelengkeicne fawec, “Ngictau yengele Ngictau, nga sugucne yengele Sugucne.”

<sup>17</sup> Aime nganibe angelo monicti wenac feina domalu yowa-malacine sugucnehac wackelu nango sasawa sawa hewacka filalangkecaigaing, yenge yanguc edocebawec, “Welening! Ngenge kpa-duckelu Wapongte nosingtowa sugucna kwesining.

<sup>18</sup> Kwesilu ngictau nga hudu-baba ngic yengele damong, ailu ngic tapilinginengkolec, ailu becosic nga ngic-ngigac yengele feiwa ngiyegaing. Ailu ngic-ngigac ngic monicte bagewa mi gagaing, nga kwelec kwekwe sugucnefocngineng yengele bagewa gagaing, ailu wac feicne nga waweweine, yengele soc-biucngineng nocebaning.”

<sup>19</sup> Aime na hudu-baba-sic nga himongte ngictau yenge hudu-baba ngicfocnginengkolec nganicebaiba. Nganicebabe yenge ngic becosic feina

---

**19:15:** Yes 11:4; 49:2; Mige 2:9; Miye 1:16; 14:20

**19:16:** Miye

17:14 **19:17:** Esek 39:17-20

ngiyewec, ye nga hudu-baba alingfocine yengeholec hudu wenaguningte kpaduckeibong.

<sup>20</sup> Aime siduc-mimi ngic kwesacinedi hudu-baba-sicte haicka pasile maaine balu gawec. Ailu ngic-ngigac hudu-baba-sicte maa bayackeibong. Ailu yele ilucine afeelu gaibong, yenge yedi kwele basifuc aiyewec. Aime ngic becosicka ngiyewec nga alingfocine yengi hudu-baba-sic nga siduc-mimi ngic kwesacine yeke bacepalu, dac nga salfadi lobelu kiwec ingucne ailu fagac, yogolec kwelina gbolicne wicepabong hauiboc.

<sup>21</sup> Aime becosic feina ngiyewec, yele mickacni hudu-babale fitec ofelu wawec, yogodi himongte ngictaule hudu-baba ngic sasawa wecebame homaibong. Homabong nango sasawa yengi kwesilu soc-biucngineng nolu gebecebawec.

## 20

### *Aleng Sugucnengineng muc-macka loibong*

<sup>1</sup> Aime angelo monic nganiiba. Nganibe ye long sugucnebenang, yogolec ki nga sentowa monic moleina balu honocmengkacni wawec.

<sup>2</sup> Walu hematowa, ye hema esecne, wacine monic Aleng Sugucnengineng, ailu Satang, ye balu hifa 1 taosentesoc ngiyenale senti hefewec.

<sup>3</sup> Aime himongne himongne ngic-ngigac hatac-mac mi kwesacebanale hefelu long sugucnebenang, iwa wickeme haume nu holecnolu aka lowec. Aime ye hifa 1 taosen game motome,

ye hatacmac lukecnome dameng bangkacnemas mucine mikac gadaicte.

<sup>4</sup> Aime na ngictaule ngiye-ngiye bocyac nganiiba. Aime ngictaule ngiye-ngiye yogolec feina ngic-ngigac ngiyeibong, yenge ngic-ngigac yowawa locebaningte bole-yowa yeleicne. Ailu habu monic yengela yanguc nganiiba, hudu-baba-sic nga ilucine mi afeelu gaibong. Ailu yele maa yengele meiwa nga molenginang mi baibong. Yenge Yesu ngagesingkelu siducine milu gaibong. Ailu Wapongte yowa mibong yegengkewec. Inguc ailu gabong ngic yengi ubengineng welockeibong, yengele ilucfocngineng nganicebaiba. Nganicebabe yenge sasawadi gboliyelu hifa 1 taosentesoc Kristoholec galu ngic-ngigac damongebaibong.

<sup>5</sup> Yogodi homackacni gboliyelu fangke-fangke yogolec molic-molicine aigac. Aime gocne homai-bong, yenge mi gboliyelu fangkebong hifa 1 taosen motome fangkedaingte.

<sup>6</sup> Aime Sugucnedi ngic-ngigac molic-molic homackacni gboliyelu fangke-fangke iwa balu taocebadaicte, yenge Wapongte bingec nga kwele-angackolec. Aime homac alecine yaeckangti yenge nalic mi bacebadaicte, yenge Wapong nga Kristole depec-baba ngic ingucne mimiteng bole bagalu hifa 1 taosen yeholec ngic-ngigac damongebadaingte.

*Aleng  
benangkeibong*

*Sugucnengineng*

*basowale-*



<sup>7</sup> Aime hifa 1 taosen motome Satang muc-mackacni lukecnodaicte.

<sup>8</sup> Lukecnome, ye hikelu himongne himongne ngic-ngigac kwesacka mengocebame ngic-ngigac himongtowa yogolec mecine 4 iwa gagaing. Himong yogo wacnginec Gok nga Magok, yogowacni ngic-ngigac yenge hudu weningte kpatulecebadaicte. Yogo yengele dzalengineng kiwec mecina dingong fagac ingucne.

<sup>9</sup> Kpatulecebame yenge himongne himongne hikelu Wapongte bingec yenge taonka gagaing, yengele kweleinedi angackecaigac, taon iwa hikelu hewalingkelu domaibong. Domabong honocmengkacni dacti walu hudu-baba ngic lobecebayackewec.

<sup>10</sup> Lobecebayackeme Aleng Sugucnengineng ye ngic-ngigac kwesacebawec, ye dac nga sulfadi lobelu kiwec ingucne ailu fagac, yogowa wickebong hauwec. Aime hudu-baba-sic nga siduc-mimi ngic kwesacine, yeke iwa momochac galu deboc hadeng doic ngagedaingte ailu ngagenowagaing, yogo moto-motoine mikac.

### *Wowosae dameng fikedaicte*

<sup>11</sup> Aime ngictaule ngiye-ngiyetowa kwalac-kwalac monic sugucnehac nganiiba. Aime ye mac ngiye-ngiye yogolec feina ngiyewec, ye momoc nganiiba. Yele haicka himong nga sawa yeke hikeboc miyac aime macnginec sawaine sugu fawec.

<sup>12</sup> Aime ngic-ngigac feicne nga waweweine biy-achac homaibong yenge nganicebaiba. Nganicebabe yenge Wapongte haicka domabong ye hibi gocne bacebalu bafilamewec. Ailu hibi monic wacine Gagale hibi yogo momoc balu bafilamewec. Aime hibi gocne iwa ngic-ngigac homaibong yengele aibabanginengte kwelengkeicne fagac. Aime ye iwa nganilu aibabangineng mimoc-towec.

<sup>13</sup> Aime kiwecka homalu hauibong gagaing, yenge kiwecti hegilecebame ofeibong. Yenge homac nga Wangec-macka homaibong gagaing, yeke inguchac yenge hegilecebaboc ofeibong. Inguc ailu ngic-ngigac filesoc filesoc aibabanginengtesocka mimoctocebawec.

<sup>14</sup> Mimoctocebalu homac nga Wangec-mac yeke nga ngic-ngigacfocnginec momochac dac lobelu kiwec ingucne ailu fagac, yogowa wicebame hauibong. Yogodi homac alecine yaeckang aigac.

<sup>15</sup> Ailu ngic-ngigac wacngineng Gagale hibiwa mi kwelengkeicne fagac, yenge dac lobelu kiwec ingucne ailu fagac, yogowa wicebame hauibong.

## 21

### *Himong nga sawa gbolicne*

<sup>1</sup> Aime na sawa nga himong gbolicne nganicepaiba. Aime himong nga sawa esecne faiboc, yeke miyac aiiboc. Aime kiwec ye hatacmac mi fadaicte.

---

**20:12:** Dan 7:9-10; Mat 25:31-46; Sale 17:31; 2Kor 5:10; Miye 13:8

**20:13:** Rom 2:6; 1Pi 1:17; Miye 2:23; 22:12      **20:15:** Dan 12:1-2

**21:1:** Yes 65:17; 2Pi 3:13

<sup>2</sup> Na taon gbagbacne, yogo Yerusalem gbolicne nganibe Wapongtacni honocmengkacni wawec. Wame ngigacti ngaweineholec molewa babac ainogale efeckecaigac, ngani-nganiine yogo ingucne ngawe-bingecinele ailu leso babong ngani-nganiine madicnebenang ailu ngiyewec.

<sup>3</sup> Ngiyeme na yowa-malac monic ngictaule ngiye-ngiyewacni ngagebe yanguc miwec, “Ngagegaing, Wapongte kpoluc-faledi ngic-ngigac yengeholec game yenge yele aling aidaingte. Ailu Wapong yeuctihac yengeholec galu Wapongngineng gadaicte.

<sup>4</sup> Ailu yedi donge-misangineng sasawa dongenginangkocni suweyackedaicte. Aime homac nga kwele-sowacte hisonggong, ailu doic yenge hatacmac mi fadaingte. Wiyac esecne faibong, yogo biyac miyac aiyackeibong.”

<sup>5</sup> Aime Sugucne ngictaule ngiye-ngiyewa ngiyewec, yedi yanguc miwec, “Ngagegaing, na wiyac sasawa babe gbolicne fikeyackegac.” Inguc milu edocnuwec, “Ga yowa yogo kwelengkec. I yangucte, yowa yago noine, aime ngic-ngigac yenge yogo nalic ngagepangkegaing.”

<sup>6</sup> Milu hatacmac yanguc edocnuwec, “Yogo biyac motogac. Na ‘A’ nga ‘Y’, yogo molic-molicine iwacni moto-motoine. Ngic-ngigac monicti misale aicnome, ye misa dongeinacni gagale misa moc nonale lacnodacte.

---

**21:2:** Yes 52:1; 61:10; Hib 11:16; 12:22; Miye 3:12      **21:3:** Dep 26:11-12; Esek 37:27; Sek 2:10-11; 2Kor 6:16      **21:4:** Yes 25:8; 35:10; 65:19; Miye 7:17      **21:5:** 2Kor 5:17      **21:6:** Yes 49:10; 55:1; Yer 2:13; Yoa 7:37; Miye 1:8,17; 22:17

7 Monicti hudu welu gbelong aidaicte, ye wiyac sasawa yago mole-damoc bame, nani yele Wapong aibe yedi madecne aidaicte.

8 Aime ngic-ngigac hangocebacaigac, nga ngage-ngagesingngineng mikac. Ailu aibabangineng sowacne wonongkolec nga ngic-wewe. Ailu selo-boic ngic, nga hefec nga mosoc bacaigaing. Ailu siduc-gbong alang bacnoaigaing, nga kwesac ngic-ngigac. Ngic-ngigac sasawa ingucne yengebac dac nga salfadi lobelu kiwec ingucne ailu fagac, yogowa hauyackedaingte. Yogo homac alecine yaeckang aigac.”

### *Yerusalem gbolicne*

9 Aime angelo 7 yenge pele 7 yogo doic 7 moto-motoinedi wakeyackeicne yogo balu domaibong, yengelacni monicti nala welelu yanguc miwec, “Ga welec. Aime nani Lama madecinele ngigac-bingecine edalicgudacte, ye yele ngigac.”

10 Inguc mime Asule tapiliwa bacnume tiki sugucne nga dalicne, yogolec feina felu Wapongtacni taon gbagbacne Yerusalem, honocmengkacni wame edalicnuwec.

11 Taon yogo ye Wapongte tapili nga hibi-angockolec. Yogo posa basufaleicne fuline sugucnehac posa sasacne ingucne wonong mikac, ailu latak-latacineholec.

12 Ailu odaine posadi baicne, yogo sugucnedi dalicne bafeicne. Ailu nuine 12 domagaing, aime nuina angelo 12 domagaing. Ailu nuina Israel

fikesaweckacni 12 yengele wacngineng inguchac kwelengkeicne domagaing.

<sup>13</sup> Aime wenac ofecaigacka haic nu habackang, notka haic nu habackang, nga sautka haic nu habackang, ailu wenac haucaigacka haic nu habackang domagaing.

<sup>14</sup> Taon sugucnele oda yogo posa yogolec fungine 12. Aime fungine 12 iwa Lama madecinele salecebaicne 12 yengele wacngineng kwelengkeicne domagac.

<sup>15</sup> Aime angelo naholec mingagec aiibec, yedi taontowa sugucne nga nuine ailu oda posadi baicne, yogolec maaine banogale kpetele maa monic yasu goldi baicne balu domawec.

<sup>16</sup> Badomame taontowa sugucne yogolec fungine 4. Ailu mecine sasawa yengele maingineng andohac aiibong. Aime angelodi maa babale yasudi maaine bame maaine yogo 12 taosen stadia\* aiwec. Nga mecine ailu feinale dalicnele maaine yogo moniyang aiiboc.

<sup>17</sup> Ye oda adecne yogolec bangkacnele maaine yogo bame 144 kubit aiwec.† Maa yogo ngicngigac yengi bacaigaing, aime angelo yengele maa yogohac aigac.

<sup>18</sup> Oda yogo posa sasacnedi baicne. Nga taontowa sugucne yogo golbenangti baicne, yogo galas ingucne latak-latacine aigac.

---

**21:12:** Esek 48:30-35    **21:15:** Esek 40:3; Miye 11:1    \* **21:16:** 12 taosen stadia yogo Vanimohocni hikegacgu Honiara yogolecsoc, yogo 2 taosen 220 kilomita ngama ingucne. Stadia moniyang yogo mita 185 ingucne aigac.    † **21:17:** 144 kubit yogo 65 mita ngama ingucne. 12 taims 12 yogo 144 aigac.    **21:18:** Yes 54:11-12

19 Aime taon sugucnele oda fungina posa bas-ufaleicnedi loyackeicne, posa yogo sasawa fuline sugucnehac, ingucnedi lesoine loicne. Fungine molic-molic iwa

posa sasacnedi loicne, lobeina, iwa

posa sowac-sowacti loicne,

3 iwa posa kwalacne, nga

4 iwa posa hedonggboli.

20 Ailu

5 iwa posa hibine medeng-medeng nga kwalac-kwalac ingucne,

6 iwa posa sasacne monic,

7 iwa posa dagec-dagec,

8 iwa posa hedonggboli ingucne monic, nga

9 iwa posa dagec-dagec ingucne monic. Ailu

10 iwa posa hedonggboli haicine monic,

11 iwa posa sowac-sowacti dagecne pung-pung kweicne, nga

12 iwa posa mondo-sasac.

Posa hibine ingucnedi locebaicne domagaing.‡

21 Yogowa kwanang hucine sugucnehac 12 ingucti nu 12 iwa domagaing. Aime nu filesoc filesocka hucine moniyang moniyangti baicne. Ailu taon sugucnele yefe yogo golbenangti baicne, yogo galas ingucne bageina nalic nganinoga.

22 Aime taon yogolec kwelina Ibu-mac monic mi nganiiba. I yangucte, Sugucne Wapong Tapilitowa Fileine nga Lama madecine yeki sugu Ibu-mac aigaic.

---

‡ 21:20: Posa wacngineng yogo yanguc, 1-yaspa, 2-safaya, 3-kalse-doni, 4-emeral, 5-sadoniks, 6-kanelian, 7-krisolait, 8-beril, 9-topas, 10-krisopres, 11-yasint, 12-ametist. Ilucngineng yogo hafac 481 yogowa fagac.

<sup>23</sup> Aime Wapongte tapili nga hibi-angocti taontowa sugucne yogo bame angolegac, aime Lama madecinedi hifaine aigac. Ilec taontowa iwa wenac nga tamacne yekele angoc mi ngagesigaing.

<sup>24-25</sup> Aime kundung ye iwa mi fadaicte, ilec hadengsoc taon nuine nalic mi holedaingte. Aime himongne himongne ngic-ngigac yenge taonte angocka lec-welec aidaingte. Aime himongte ngictau yenge wiyacngineng wac feicneholec balu felu iwa ibu ingucne lodaingte.

<sup>26</sup> Lobong himongne himongne ngic-ngigac yenge wiyacngineng alang-babaineholec nga wac feicneholec balu yogolec kwelina fedaingte.

<sup>27</sup> Ailu wiyac monic wonongkolec nga ngic-ngigac aibabangineng sowacnebenang memenguine, ailu kwesacnginengkolec, yenge taontowa yogolec kwelina nalic mi fedaingte, miyac. Ngic-ngigac wacngineng Lama madecinele Gagale hi-biwa kwelengkeicne fagac, yengi sugu fedaingte.

## 22

### *Gagale misa*

<sup>1</sup> Aime angelodi misa monic gagaineholec edalicnuwec. Misa yogo latak-latacine ailu Wapong nga Lama madecine yekele ngictaule ngiye-ngiyewacni ofelu

<sup>2</sup> taontowale yefe sugucnele hewacka hikelu fagac. Fame mecine neboc nga neboc iwa gagale yoc domagaic, yeke hifasoc noine aiboc alecine 12

---

**21:23:** Yes 60:19-20; Miye 22:5  
Yes 52:1; Esek 44:9; 1Kor 6:9-10

**21:24-25:** Yes 60:3,5,11

**21:27:**

**22:1:** Esek 47:1

aicaigac. Yeke tamacnesoc noineholec aicaigaic. Ailu yoc yekele hekengnginecti himongne himongne ngic-ngigac bamadicebanoga.

<sup>3</sup> Aime monicti Wapongte aalicta bagewa hat-acmac mi gadaicte, miyac. Wapong nga Lama madecine yekele ngictaule ngiye-ngiye sugudi taon iwa ngiyeme kwelec kwekwefocine yenge ye afeelu kwelec kwecnodaingte.

<sup>4</sup> Yenge yele haic-mesuine nganidaingte, aime ye wacine yengele meiwa kwelengkeme fadaicte.

<sup>5</sup> Iwa kundung hatacmac mi aidaicte, nga hifa me wenacte angoc yogo mi ngagesidaingte. I yangucte, Sugucne Wapongte angocti angoledaicte. Aime ngic-ngigac yenge ngictaule bole badaingte, yogo dameng moto-motoine mikac balu gadaingte.

<sup>6</sup> Aime yanguc edocnuwec, “Yowa yago noine, aime ngic-ngigac yenge yogo nalic ngagepangkegaing. Aime Sugucne ye siduc-mimi ngic yengele kwele-ngage-ngagenginengte Wapong, ye kwelec kwekwefocine wiyac biyac fikedaicte, yogo nganiningte ailu angeloine salewec.”

### *Yesu kwesidaicte*

<sup>7</sup> “Ngagegaing, na biyac kwesidacte! Monic ye siduc-mimi ngic yele yowa hibi yagowa kwe-lengkeicne fagac, yogo balu madicne balaibelu gadaicte, ye kwele-angackolec.”

**22:2:** Fike 2:9; Esek 47:12; Yol 3:18; Sek 14:8      **22:3:** Sek 14:11

**22:4:** Mat 5:8; Miye 3:12      **22:5:** Dan 7:18,27; Miye 5:10; 20:6;  
21:23,25      **22:6:** Miye 1:1      **22:7:** Miye 1:3



8 Na Yoanedi wiyac yogo ngani-ngagec aiba. Aime nganibe motome angelo wiyac edalicnuwec, yele higewa ketadi holecnolu afeenogale aibe

9 yedi yanguc edocnuwec, “Inguc mi ainong. Na ga nga siduc-mimi ngic hae-gbafocgone, yenge ailu ngic-ngigac hibi yagolec yowa madicne balu balaibelu gacaigaing, ngengele kwelec kwekwe agongineng. Ga Wapong afeenong!

10 “Dameng bangkalegacte ailu ga hibi yagolec siduc-yowa yogo aka mi lolu hegileng fadaic, miyac. Ga miyengka yegengkedaic.

11 Monic ye aibaba sowacne aicaigac, ye aibaba yogohac balu gadaic. Nga wonongkolec gagac, ye ingucnehac gadaic.\* Aime aibaba dondonne aicaigac, ye dondonnehac aidaic. Ailu Wapongte bingec gagac, ye Wapongte bingec gadaic.”

12-13 “Ngagegaing, na ‘A’ nga ‘Y’, molic-molic nga lobe, ailu molic-molicine iwacni moto-motoine. Na biyac kwesilu ngic-ngigac filesoc filesoc aiba-banginengte ameine yelenogale balu kwesidacte.

14 Balu kwesibe ngic-ngigac ngakpingineng dalicne suweicne, yenge kwele-angackolec. I yangucte, yenge gagale yoc noine noningte tapili yeleicne, ailu taon nuina yefe nalic fedaingte.

15 Aime ngic-ngigac hoda ingucne aibabangineng wonongkolec gagaing, nga hefec nga mosoc

---

**22:8:** Miye 19:10    **22:10:** Dan 12:4    \* **22:11:** Aibaba sowacne ingucnedi mi madickegac. Aimebac monicti kwele-hefaliyecte mi aigac, ye aibaba ingucne bagacgu dacka haudaicte.    **22:11:** Dan 12:10; Esek 3:27    **22:12-13:** Yes 40:10; 44:6; Yer 17:10; Miye 1:8,17; 21:6; 2:23    **22:14:** Fike 2:9; 3:22

bacaigaing, ailu selo-boic aling nga ngic we-cebacaigaing. Nga siduc-gbong alang bayele-caigaing, ailu sasawadi kwesac-aibabale angac ngagelu kwesac aicaigaing, yengebac taon lobina gadaingte.

<sup>16</sup> Na Yesudi angelone salebe yedi yowa yago nale habufocne ngengela mime yegengkengelenale kwesiwec. Na Dawidilacni gidec, nga ngamboine, ailu ubiyacte asocmeng hibi-angocineholec, na yogo hocne.”

<sup>17</sup> Asu nga Lama madecinele ngigac-bingecine yeki “Ga welec” migabiyec. Ailu monic ye yowa yogo ngagedaicte, ye “Ga welec” midaic. Aime monic ye misale aicnoaigac, ye kwesilu gagale misa fuline mikac moc balu nodaic.

### *Yowa moto-motoine*

<sup>18</sup> Aime ngic-ngigac hibi yagolec siduc-yowa ngagegaing, ngengele sawang-yowa milu yanguc migabac, “Monicti yowa yago fagac, iwahac yowa monic taockedaictewa, Wapongti hibi yagowa doicte kwelengkeicne fagac, ye iwa taockedaicte.

<sup>19</sup> Ailu monicti siduc-yowa yago fagac, iwacni yowa monic baickedaictewa, Wapongti gagale yockacni noine nebocine ye mi lacnodaicte. Ailu taon gbagbacnele hibi yagowa kwelengkeicne fagac, iwa nalic mi fedaicte.”

<sup>20</sup> Aime wiyac yagolec mime yegengkengelegac, yedi yanguc migac, “Noine, na biyac kwesidacte.”

Yogo foinac. Oc, Sugucne Yesu, ga welec.

21 Sugucnenonggeng Yesule kwele-madicti  
Wapongte bingec sasawa ngenela fadaic. Yogo  
foinac.

**Migabac Bible Portions**  
**Portions of the Bible in the Migabac language of Papua**  
**New Guinea**  
**Sampela hap long Buk Baibel long tokples Migabac**  
**long Niugini**

copyright © 2010-2020 Wycliffe Bible Translators, Inc.

Language: Migabac

Translation by: Wycliffe Bible Translators

Audio recording © 2013 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-02-20

---

PDF generated using Haiola and XeLaTeX on 18 Apr 2025 from source files dated 31 Aug 2023

620e6058-116b-51e5-b20a-ab9e8b9bea5d